



EUROPEAN COURT OF HUMAN RIGHTS
COUR EUROPÉENNE DES DROITS DE L'HOMME

ԱՌԱՋԻՆ ԲԱԺԱՆՄՈՒՆՔ

ԱԴՅԱՆԸ ԵՎ ԱՅԼՔ ԸՆԴԴԵՄ ՀԱՅԱՍՏԱՆԻ

(Գանգաղ թիվ 75604/11)

ՎՃԻՌ

ՍՏՐԱՍԲՈՒՐԳ

12 հոկտեմբերի 2017թ.

Սույն վճիռը վերջնական է դառնում Կոնվենցիայի 44-րդ հոդվածի 2-րդ կետով սահմանված դեպքերում: Այն կարող է ենթարկվել խմբագրական փոփոխությունների:



COUNCIL OF EUROPE

CONSEIL DE L'EUROPE

Աղյանը եւ այլք ընդդեմ Հայաստանի գործով,

Մարդու իրավունքների եվրոպական դատարանը (Առաջին բաժանմունք),
հանդես գալով Պալատի հետեւյալ կազմով՝

Լինոս-Ալեքսանդր Սիցիլիանոս [Linos-Alexandre Sicilianos]՝ *Նախագահ,*

Քրիստինա Պարդալոս [Kristina Pardalos],

Ալեշ Պեյխալ [Aleš Pejchal],

Քսենիա Տուրկովիչ [Ksenija Turković],

Պաուլին Կոսկելո [Pauliine Koskelo],

Թիմ Այքը [Tim Eicke]՝ *դատավորներ,*

Սիրանուշ Սահակյան [Siranush Sahakyan]՝ *ad hoc (ժամանակավոր)*
դատավոր,

եւ Աբել Կամպոս [Abel Campos]՝ *Բաժանմունքի քարտուղար,*

2017 թվականի սեպտեմբերի 19-ին անցկացնելով դռնփակ
խորհրդակցություն,

կայացրեց հետեւյալ վճիռը, որն ընդունվեց նույն օրը.

ԸՆԹԱՑԱԿԱՐԳԸ

1. Սույն գործը հարուցվել է «Մարդու իրավունքների եւ հիմնարար
ազատությունների պաշտպանության մասին» կոնվենցիայի (Կոնվենցիա) 34-րդ
հոդվածի համաձայն, Հայաստանի Հանրապետության չորս քաղաքացիներ պրն
Արթուր Աղյանի, պրն Գարեգին Ավետիսյանի, պրն Հարություն Խաչատրյանի եւ
պրն Վահագն Մարգարյանի (միասին՝ դիմումատուներ) կողմից ընդդեմ
Հայաստանի Հանրապետության՝ 2011 թվականի դեկտեմբերի 6-ին Դատարան
ներկայացված գանգատի (թիվ 75604/11) հիման վրա:

2. Դիմումատուներին ներկայացրել են Սավոյի եւ Ժնեւի համալսարանների իրավագիտության պրոֆեսոր պրն Պ. Մուզնին եւ համապատասխանաբար Փարիզում ու Երեւանում գործող իրավաբաններ պրն Ա Կարբոնյոն եւ պրն Ա. Մարտիրոսյանը: Հայաստանի Հանրապետության կառավարությունը (Կառավարություն) ներկայացրել է Մարդու իրավունքների եվրոպական դատարանում Հայաստանի Հանրապետության կառավարության լիազոր ներկայացուցիչ պրն Գ. Կոստանյանը:

3. Դիմումատուները պնդել են, մասնավորապես, որ նրանց նկատմամբ կայացված մեղադրական դատավճիռներով խախտվել են Կոնվենցիայի 9-րդ հոդվածով սահմանված երաշխիքները, եւ իրենց կալանավորման հիմքում ընկած է եղել դատարանների կարծրատիպային պատճառաբանությունը:

4. Զինվորական եւ այլընտրանքային ծառայությունից խուսափելու համար դիմումատուներին դատապարտելու ու դատարանների կողմից դիմումատուներին մինչդատական վարույթում կալանքի տակ պահելու համար հիմնավոր եւ բավարար պատճառներ չներկայացնելու վերաբերյալ բողոքը 2016 թվականի փետրվարի 29-ին ուղարկվել է Կառավարություն, իսկ գանգատը մնացած մասով հայտարարվել է անընդունելի՝ համաձայն Դատարանի կանոնակարգի 54-րդ կանոնի 3-րդ կետի:

5. Հայաստանի կողմից ընտրված դատավոր պրն Արմեն Հարությունյանն ի վիճակի չի եղել մասնակցելու գործի քննությանը (Դատարանի կանոնակարգի 28-րդ կանոն): Համապատասխանաբար, Պալատի նախագահը որոշել է տկն Սիրանուշ Սահակյանին նշանակել որպես *ad hoc* դատավոր (29-րդ կանոնի 1(բ) կետ):

ՓԱՍՏԵՐԸ

I. ԳՈՐԾԻ ՓԱՍՏԱԿԱՆ ՀԱՆԳԱՄԱՆՔՆԵՐԸ

6. Պրն Ադյանը (առաջին դիմումատու) ծնվել է 1991 թվականին, իսկ պրն Ավետիսյանը, պրն Խաչատրյանը եւ պրն Մարգարյանը (երկրորդ, երրորդ եւ չորրորդ դիմումատուներ) ծնվել են 1993 թվականին: Առաջին եւ երկրորդ դիմումատուներն ապրում են Երեւանում, իսկ երրորդ եւ չորրորդ դիմումատուները՝ համապատասխանաբար Ծաղկավանում ու Կապանում:

Ա. Գործի նախապատմությունը

7. Դիմումատուները Եհովայի չորս վկաներ են, որոնք ճանաչվել են զինվորական ծառայության համար պիտանի:

8. 2011 թվականի մայիսին ու հունիսին դիմումատուները զորակոչվել են զինվորական ծառայության: Նրանք չեն ներկայացել, փոխարենը իրենց բնակության վայրի զինվորական կոմիսարիատ եւ մարզային դատախազություն են ուղարկել գրություններ՝ հրաժարվելով անցնել զինվորական կամ այլընտրանքային ծառայություն: Նրանք նշել են Եհովայի վկաներ լինելու հանգամանքը եւ պնդել, որ իրենք, ուսումնասիրելով «Այլընտրանքային ծառայության մասին» օրենքը, հանգել են այն եզրակացության, որ, եվրոպական չափանիշների համաձայն, առկա ծառայությունը չունի լիարժեք քաղաքացիական բնույթ, քանի որ այն վերահսկվում է զինվորական մարմինների կողմից: Իրենց խիղճը թույլ չի տալիս իրենց ուղղակիորեն կամ անուղղակիորեն աշխատել զինվորական համակարգի համար: Հայտնի է, որ այլընտրանքային աշխատանքային ծառայությունը կազմակերպվել եւ վերահսկվել է զինվորական մարմինների կողմից, քանի որ այլընտրանքային աշխատանքային ծառայողների գրքույկների վրա նշված է եղել «Հայաստանի Հանրապետության զինված ուժեր», եւ այլընտրանքային զինծառայողները պահպանել են զինվորական կարգապահության կանոնները եւ ենթարկվել են պատիժների, ինչպես նաեւ

հաշվառվել են Հայաստանի Հանրապետության զինված ուժերի ռազմական ստորաբաժանումներում: Ավելին, օրենքով պահանջվում էր, որ նրանք իրենց ծառայության վայրում մնային շուրջօրյա՝ շաբաթը յոթ օր, ինչը հիշեցնում էր տնային կալանք եւ անընդունելի էր դիմումատուների համար: Զինվորական ծառայություն կամ առաջարկվող այլընտրանքային ծառայություն անցնելու պահանջով խախտվում էր, *inter alia* (ի թիվս այլնի), Մարդու իրավունքների եվրոպական կոնվենցիայի 9-րդ հոդվածով երաշխավորված իրենց իրավունքները: Վերոնշյալ պատճառներով նրանց խիղճը թույլ չի տվել նրանց անցնել Հայաստանում առկա այլընտրանքային ծառայություն: Դիմումատուներն ավելացրել են, որ նրանք պատրաստ են անցնել այլընտրանքային ծառայություն միայն այն դեպքում, եթե այն որեւէ առնչություն չունենա զինվորական մարմինների հետ, եւ դրանով չխախտվեն իրենց կրոնական համոզմունքները:

Բ. Դիմումատուների նկատմամբ մեղադրանքները եւ առաջին, երրորդ ու չորրորդ դիմումատուներին մինչդատական վարույթում կալանքի տակ պահելը

1. Երկրորդ դիմումատուին

9. 2011 թվականի հունիսի 15-ին երկրորդ դիմումատուին մեղադրանք է առաջադրվել Քրեական օրենսգրքի 327-րդ հոդվածի 1-ին մասի համաձայն (Ժամկետային զինվորական կամ այլընտրանքային ծառայությունից, վարժական հավաքներից կամ զորահավաքներից խուսափելը):

2. Առաջին եւ չորրորդ դիմումատուները

10. 2011 թվականի հուլիսի 6-ին առաջին եւ չորրորդ դիմումատուները ձերբակալվել են:

11. 2011 թվականի հուլիսի 7-ին առաջին եւ չորրորդ դիմումատուներին առաջադրվել է միեւնույն մեղադրանքը: Սյունիքի մարզային դատարանը, նրանց

կալանավորելու վերաբերյալ քննիչի միջնորդությունը համարելով հիմնավորված, որոշել է կալանավորել նրանց:

12. 2011 թվականի հուլիսի 28-ին Վերաքննիչ քրեական դատարանը մերժել է կալանավորելու մասին որոշումների դեմ առաջին եւ չորրորդ դիմումատուների կողմից ներկայացված բողոքները՝ գտնելով, *inter alia*, որ, քանի որ վերագրվող հանցանքի համար նախատեսված է մեկ տարուց ավելի ժամկետով ազատազրկում, դա մեծացնում է առաջին եւ չորրորդ դիմումատուների կողմից ազատության մեջ մնալու դեպքում նոր հանցանք կատարելու եւ պատժից խուսափելու հավանականությունը:

3. Երրորդ դիմումատուն

13. 2011 թվականի հուլիսի 27-ին երրորդ դիմումատուին առաջադրվել է միեւնույն մեղադրանքը, եւ Տավուշի մարզային դատարանը քննիչի պահանջով նրան կալանավորելու մասին որոշում է կայացրել՝ գտնելով, որ կան ողջամիտ կասկածներ, որ նա կատարել է այն հանցանքը, որի համար նրան մեղադրանք է առաջադրվել:

14. Չպարզված օրը նրա քրեական գործն ուղարկվել է դատարան:

15. 2011 թվականի օգոստոսի 19-ին Տավուշի մարզային դատարանը գործը դատական քննության նշանակելու վերաբերյալ որոշում է կայացրել՝ գտնելով, որ «կալանքը պետք է մնա անփոփոխ»:

16. 2011 թվականի օգոստոսի 24-ին Վերաքննիչ քրեական դատարանը քննել է 2011 թվականի հուլիսի 27-ի՝ կալանավորելու մասին որոշման դեմ երրորդ դիմումատուի կողմից ներկայացված բողոքը եւ կայացրել է այն մերժելու մասին որոշում՝ գտնելով, *inter alia*, որ այն հանցանքի համար, որում նա մեղադրվում է, սահմանված է մեկ տարուց ավելի ժամկետով պատիժ, ինչը մեծացնում է ազատության մեջ մնալու դեպքում նրա կողմից նոր հանցանք կատարելու կամ պատժից խուսափելու հավանականությունը:

Գ. Դատական վարույթը եւ դիմումատուների դատապարտումը

17. Գործն ըստ էության քննող իրենց համապատասխան դատարաններում անցկացված վարույթների ընթացքում դիմումատուները նշել են, որ զինվորական եւ այլընտրանքային ծառայությանը դեմ լինելը բխում է իրենց կրոնական համոզմունքներից: Ներպետական օրենսդրությամբ նախատեսված այլընտրանքային ծառայությունը չունի լիարժեք քաղաքացիական բնույթ, քանի որ այն վերահսկվում է զինվորական մարմինների կողմից: Համոզմունքի հիմնավորմամբ զինվորական ծառայությունից հրաժարվելու իրավունքը, *inter alia*, պաշտպանված է Կոնվենցիայի 9-րդ հոդվածով: Դիմումատուները պատրաստ են անցնելու այլընտրանքային ծառայություն միայն այն դեպքում, եթե այն չի վերահսկվում զինվորական մարմինների կողմից եւ ունի լիարժեք քաղաքացիական բնույթ:

18. 2011 թվականի հուլիսի 19-ին Կոտայքի մարզային դատարանը երկրորդ դիմումատուին մեղավոր է ճանաչել եւ նրան դատապարտել է երկու տարի եւ վեց ամիս ժամկետով ազատազրկման: Նույն օրը նա կալանքի տակ է առնվել:

19. 2011 թվականի հուլիսի 27-ին Սյունիքի մարզային դատարանը նույնանման պատիժներ է սահմանել առաջին եւ չորրորդ դիմումատուների նկատմամբ:

20. 2011 թվականի նոյեմբերի 25-ին Տավուշի մարզային դատարանը նույնանման պատիժ է սահմանել երրորդ դիմումատուի նկատմամբ:

21. Դիմումատուներն իրենց նկատմամբ կայացված մեղադրական դատավճիռների առնչությամբ ներկայացրել են վերաքննիչ բողոքներ՝ պնդելով, որ դրանցով խախտվել են Կոնվենցիայի 9-րդ հոդվածի պահանջները: Հայաստանում առկա այլընտրանքային ծառայությանն իրենց դեմ լինելը պայմանավորված է իրենց կրոնական համոզմունքներով, քանի որ այդ ծառայությունը չունի լիարժեք քաղաքացիական բնույթ եւ չի համապատասխանում եվրոպական չափանիշներին: Այն կազմակերպվում է

վերահսկվում է զինվորական մարմինների կողմից («Այլընտրանքային ծառայության մասին» օրենքի 14-րդ հոդված (տե՛ս ստորել՝ 28-րդ պարբերությունը)) եւ համարժեք է չզինված զինվորական ծառայությանը, մինչդեռ նրանց խիղճը թույլ չի տալիս իրենց անցնել զինվորական մարմինների կողմից վերահսկվող որեւէ ծառայություն: Ավելին, Օրենքի 17-րդ հոդվածի 3-րդ մասով զինվորական մարմինն իրավունք է վերապահվում պահանջելու այլընտրանքային աշխատանքային ծառայողի՝ մեկ այլ կազմակերպություն փոխադրումը, իսկ ծառայության որոշ մասեր կազմակերպվում են զինվորական կանոնների համաձայն (Օրենքի 18-րդ հոդվածի 2-րդ մաս): Այլընտրանքային աշխատանքային ծառայողներից նաեւ պահանջվում է կրել զինվորական համազգեստ հիշեցնող համազգեստ եւ կատարել հրամաններ, ինչպես նաեւ նրանց չի թույլատրվում ինքնակամ լքել իրենց ծառայության վայրը: Այլընտրանքային աշխատանքային ծառայողի գրքույկի կազմի վրա պատկերված են զինանշանը եւ «Հայաստանի Հանրապետության զինված ուժեր» բառերը, իսկ ամսական դրամական բավարարումը տրվում է շարքային զինծառայողի համար սահմանված չափով: Ավելին, այլընտրանքային ծառայությունն ունի պատժիչ բնույթ, քանի որ դրա տեսողությունը քառասուներկու ամիս է, եւ այլընտրանքային ծառայողից պահանջվում է ծառայության վայրում մնալ շուրջօրյա: Նրանք կրկին նշել են լիարժեք քաղաքացիական բնույթ ունեցող ծառայություն անցնելու իրենց պատրաստակամությունը եւ պնդել, որ նրանց համար սահմանված պատիժները եվրոպական չափանիշներին անհամապատասխան եւ լիարժեք քաղաքացիական բնույթ չունեցող այլընտրանքային ծառայության բացակայության պայմաններում չեն բխում ծայրահեղ սոցիալական անհրաժեշտությունից եւ անհրաժեշտ չեն ժողովրդավարական հասարակությունում:

22. 2011 թվականի դեկտեմբերի 2-ին Վերաքննիչ քրեական դատարանը անփոփոխ է թողել առաջին եւ երկրորդ դիմումատուների գործերով մարզային դատարանների կայացրած դատավճիռները:

Առաջին դիմումատուի դեպքում Վերաքննիչ դատարանը գտել է, որ՝

«Վերաքննիչ դատարանը, քննության առնելով պաշտպանության կողմի պատճառաբանությունները՝ Հայաստանի Հանրապետությունում այլընտրանքային աշխատանքային ծառայությունը եվրոպական չափանիշներին չհամապատասխանելու, զինվորական բնույթ կրելու, զինվորական մարմինների կողմից վերահսկվելու վերաբերյալ, փաստում է, որ [պետությունը] ... պատշաճ միջոցներ է ձեռնարկում՝ Եվրոպայի խորհրդի առջեւ ստանձնած պարտավորությունները, մասնավորապես, կապված այլընտրանքային ծառայության մասին օրենսդրությունը ընդունելու եւ այն մշտապես կատարելագործելու ուղղությամբ:

Վերաքննիչ դատարանը հարկ է համարում արձանագրել, որ այլընտրանքային ծառայության մասին ընդունված ՀՀ օրենքը, տվյալ հարաբերությունները կարգավորող ՀՀ Կառավարության որոշումները, ինչպես նաեւ համապատասխան գերատեսչական նորմատիվ ակտերը, բխում են ՀՀ սահմանադրության պահանջներից, ուստի ենթակա են կիրառման սույն քրեական գործի շրջանակներում, հետեւյալ նկատառումներով:

[Հղում Օրենքի 2-րդ հոդվածին եւ 3-րդ հոդվածի 1-ին մասին (տե՛ս ստորեւ՝ 28-րդ պարբերությունը)]

Վերը վկայակոչված հոդվածներից հետեւում է, որ [պետությունը] հստակ սահմանազատել է այլընտրանքային զինվորական ծառայությունը այլընտրանքային աշխատանքային ծառայությունից եւ օրենքով երաշխավորել է այդ տեսակի ծառայության քաղաքացիական բնույթը:

[Հղում Օրենքի 17-րդ հոդվածին եւ 18-րդ հոդվածի 3-րդ մասին (տե՛ս ստորեւ՝ 28-րդ պարբերությունը)]

Վերաքննիչ դատարանը, վերլուծելով վերոհիշյալ իրավադրույթները, հարկ է համարում նշել, որ ծառայողի այլընտրանքային աշխատանքային ծառայության անցնելու կապակցությամբ կազմակերպության [որտեղ անցկացվում է այլընտրանքային ծառայությունը] ղեկավարի կողմից զինվորական կառավարման նշված պաշտոնյաներին [տարածքային զինվորական կոմիսարիատ] տեղեկացնելը, ծառայողին այլ կազմակերպություն կամ այլ վայր ծառայության փոխադրելու, ինչպես նաեւ այն հանգամանքը, որ այլընտրանքային աշխատանքային ծառայողները ծառայությունից պահեստ արձակվում եւ պահեստազորում հաշվառվում են օրենքով սահմանված կարգով, հիմք չեն հանգելու այն հետեւության, որ այլընտրանքային աշխատանքային ծառայությունը Հայաստանում կրում է զինվորական բնույթ, քանի որ ... տվյալ աշխատանքի տեսակը,

կարգն ու պայմանները սահմանում են համապատասխան կազմակերպությունների ղեկավարները, առանց զինվորական մարմինների կամ նրանց ներկայացուցիչների միջամտության:

Բացի այդ, այլընտրանքային աշխատանքային ծառայության կազմակերպման եւ իրականացման համար պատասխանատու է կազմակերպության ղեկավարը, այլ ոչ թե ՀՀ զինված ուժերի ստորաբաժանումները:

Պաշտպանության կողմից բերված պատճառաբանությունն այն մասին, որ այլընտրանքային աշխատանքային ծառայությունը վերահսկում է պաշտպանության բնագավառում ՀՀ կառավարության լիազորած պետական կառավարման մարմինը, նույնպես չի կարող վկայել այն մասին, որ Հայաստանում այլընտրանքային աշխատանքային ծառայություն առկա չէ: Հարկ է նշել, որ իրականում ծառայողները աշխատանքային ծառայությունն անցնում են ՀՀ զինված ուժերից դուրս, որը իր մեջ չի պարունակում զինվորական ծառայության տարրեր:

Վերաքննիչ դատարանը հարկ է համարում նշել նաեւ, որ «Այլընտրանքային ծառայության մասին» ՀՀ օրենքի ուսումնասիրությունը ցույց է տալիս, որ այլընտրանքային աշխատանքային ծառայություն անցնող ծառայողների իրավական կարգավիճակից բխող առանձնահատկությունները ամրագրված են նշված օրենքով եւ ՀՀ աշխատանքային օրենսդրությամբ սահմանված կարգով եւ նրանք հանդիսանում են աշխատանքային, այլ ոչ թե զինվորական հարաբերությունների սուբյեկտներ:

Վերոհիշյալ եզրահանգման մասին են վկայում օրենքում ամրագրված նաեւ մի շարք այլ դրույթները, մասնավորապես այն, որ այլընտրանքային աշխատանքային ծառայողները ենթարկվում են միայն համապատասխան քաղաքացիական կազմակերպությունների ղեկավարներին, պարտավոր են կատարել միայն նրանց հրամաններն ու կարգադրությունները, ղեկավարվում են կազմակերպության ներքին կարգապահության կանոններով, ծառայողների եւ նրանց ընտանիքների անդամների սոցիալական ապահովությունը իրականացվում է ոչ թե զինվորական, այլ պետական կենսաթոշակների մասին օրենսդրությամբ սահմանված կարգով (հոդվածներ 19, 20):

Հարկ է նշել, որ ՀՀ Կառավարության 25.06.2004թ. ընդունած թիվ 940-Ն որոշմամբ հաստատվել է այլընտրանքային ծառայություն անցնելու վայրերի ցանկը եւ այլընտրանքային ծառայողի համազգեստի ձեւն ու կրելու կարգը:

Նշված որոշման 2-րդ մասի «բ» կետում սահմանված է, որ «Այլընտրանքային աշխատանքային ծառայողներն իրենց ծառայությունն անցնում են ՀՀ առողջապահության

նախարարության եւ ՀՀ աշխատանքի եւ սոցիալական հարցերի նախարարության համակարգերի կազմակերպություններում»:

Որոշման [1-ին հավելվածի] համաձայն՝ «նշված գերատեսչություններում այլընտրանքային աշխատանքային ծառայությունը ծառայողները կատարում են սանիտարի պաշտոնում:»

ՀՀ Կառավարությունը նշված գերատեսչությունների, ինչպես նաեւ ՀՀ պաշտպանության նախարարներին հանձնարարել է իրականացնել որոշ պարտականություններ՝ ծառայողներին հանդերձանքով, սննդով, դրամական միջոցներով ապահովելու եւ կազմակերպչական բնույթի այլ աշխատանքներ կատարելու վերաբերյալ (որոշման 3-րդ կետ):

Այն հանգամանքը, որ ՀՀ պաշտպանության նախարարը նույնպես ներգրավված է այլընտրանքային ծառայությունը կազմակերպելու գործունեությանը, չի կարող հիմք հանդիսանալ արձանագրելու, որ դրանով աշխատանքային ծառայությունը վերածվում է զինվորական ծառայության, քանի որ նախ, ՀՀ պաշտպանության նախարարը եւ ՀՀ զինված ուժերի որոշ ստորաբաժանումները կոչված են մասնակցելու այլընտրանքային զինվորական ծառայությունը կազմակերպելու գործում:

Իսկ ինչ վերաբերում է այն հանգամանքին, որ զինվորական կառավարման մարմինները օրենքով սահմանված կարգով աշխատանքային ծառայողների նկատմամբ համապատասխան գերատեսչությունների ղեկավարների հետ համատեղ վերահսկողություն են իրականացնում, ապա վերաքննիչ դատարանը գտնում է, որ դրանով, միեւնույն է, չի փոխվում ծառայության բնույթը: Դեռ ավելին, ինչպես վերը նշվեց, որ քաղաքացիական աշխատանքի տեսակը, կարգն ու պայմանները սահմանում է եւ դրանք կարող է փոխել միայն տվյալ կազմակերպության ղեկավարը:

...

Հարկ է նշել, որ Հայաստանի Հանրապետության համապատասխան բուժհաստատություններում սանիտարի պարտականություններ կատարելը ոչ միայն նվաստացուցիչ չէ, այլ ընդհակառակը, մարդասիրական է, ծառայում է հասարակական շահերին եւ ուղղված է մարդու կյանքի ու առողջության պահպանմանը:

Անհիմն է նաեւ պաշտպանության կողմի այն պատճառաբանությունը, որ այլընտրանքային աշխատանքային ծառայությունն իրականում կրում է պատժի բնույթ:

...

Որպիսի պայմաններում, վերաքննիչ դատարանը, ելնելով սույն քրեական գործի կոնկրետ հանգամանքներից, այն է՝ որ [առաջին դիմումատուն] կտրականապես հրաժարվել է այլընտրանքային աշխատանքային ծառայության մեկնելուց, հանգում է այն հետետության, որ նա դրա համար հիմնավոր եւ արդարացի կերպով է ենթարկվել քրեական պատասխանատվության, պատժի եւ այդ հանգամանքը չի հակասում Կոնվենցիայի 9-րդ հոդվածի վերաբերյալ՝ Եվրոպական դատարանի վերոհիշյալ իրավական դիրքորոշմանը»:

Երկրորդ դիմումատուի դեպքում Վերաքննիչ դատարանը գտել է, որ նրա դատապարտումը եղել է օրինական, հիմնավորված եւ պատճառաբանված:

23. 2011 թվականի դեկտեմբերի 9-ին եւ 2012 թվականի մարտի 6-ին Վերաքննիչ քրեական դատարանը երրորդ եւ չորրորդ դիմումատուների գործերով կայացրել է առաջին դիմումատուի գործով որոշմանը նույնանման որոշում:

24. Դիմումատուները ներկայացրել են վճռաբեկ բողոքներ, որոնցում բերել են այն նույն փաստարկները, ինչ իրենց վերաքննիչ բողոքներում:

25. 2012 թվականի փետրվարի 7-ին, 8-ին եւ 17-ին ու մայիսի 7-ին Վճռաբեկ դատարանը դիմումատուների բողոքները հայտարարել է անընդունելի՝ հիմքերի բացակայության պատճառով:

26. 2013 թվականի հոկտեմբերի 8-ին եւ 9-ին համաներման արդյունքում դիմումատուներն ազատ են արձակվել ազատազրկման վայրից՝ իրենց պատիժը կրելով քսանվեցից քսանյոթ ամիս:

II. ՆԵՐՊԵՏԱԿԱՆ ՕՐԵՆՍԴՐՈՒԹՅՈՒՆԸ ԵՎ ՊՐԱԿՏԻԿԱՆ

Ա. Քրեական օրենսգիրք (ուժի մեջ է 2003 թվականից)

27. 327-րդ հոդվածի 1-ին մասով նախատեսվում է, որ ժամկետային զինվորական կամ այլընտրանքային ծառայության հերթական զորակոչից, վարժական հավաքից կամ զորավարժանքից խուսափելը՝ այդ ծառայությունից ազատվելու՝ Հայաստանի Հանրապետության օրենսդրությամբ սահմանված կարգով հիմքերի բացակայության դեպքում՝ պատժվում է կալանքով (այս

համատեքստում սահմանված է որպես խիստ մեկուսացման պայմաններում անազատության մեջ պահելը՝ առավելագույնը երկու ամիս ժամկետով, կամ ազատազրկմամբ՝ առավելագույնը երեք տարի ժամկետով:

Բ. «Այլընտրանքային ծառայության մասին» օրենք

1. *Տվյալ ժամանակահատվածում գործող «Այլընտրանքային ծառայության մասին» օրենք*

28. 2003 թվականի դեկտեմբերի 17-ին ընդունված, 2004 թվականի հուլիսի 1-ին ուժի մեջ մտած «Այլընտրանքային ծառայության մասին» օրենքի համապատասխան դրույթներն ունեն հետեւյալ բովանդակությունը.

Հոդված 2. Այլընտրանքային ծառայության հասկացությունը եւ տեսակները

«1. Սույն օրենքի իմաստով այլընտրանքային է համարվում ժամկետային պարտադիր զինվորական ծառայությանը փոխարինող ծառայությունը, որը կապված չէ զենք կրելու, պահելու, պահպանելու եւ օգտագործելու հետ ու իրականացվում է ինչպես զինվորական, այնպես էլ քաղաքացիական հիմնարկներում:

2. Այլընտրանքային ծառայության տեսակներն են՝

ա) այլընտրանքային զինվորական՝ Հայաստանի Հանրապետության զինված ուժերում իրականացվող մարտական հերթապահության, զենք կրելու, պահելու, պահպանելու եւ օգտագործելու հետ չկապված զինվորական ծառայություն.

բ) այլընտրանքային աշխատանքային՝ Հայաստանի Հանրապետության զինված ուժերից դուրս իրականացվող աշխատանքային ծառայություն:

3. Այլընտրանքային ծառայության նպատակը հայրենիքի եւ հասարակության առջեւ քաղաքացիական պարտքի կատարման ապահովումն է եւ չունի պատժի, անձի պատվի եւ արժանապատվության նվաստացման բնույթ:»

Հոդված 3. Այլընտրանքային ծառայության անցնելու հիմքը

«1. Այլընտրանքային ծառայության կարող է անցնել Հայաստանի Հանրապետության այն քաղաքացին, որի կրոնական դավանանքին կամ համոզմունքներին հակասում են ռազմական ստորաբաժանումներում զինվորական ծառայություն անցնելը, ինչպես նաև զենք կրելը, պահելը, պահպանելը եւ օգտագործելը: ...»

Հոդված 5. Այլընտրանքային ծառայության ժամկետը

«Այլընտրանքային զինվորական ծառայության ժամկետը սահմանվում է 36 ամիս:

Այլընտրանքային աշխատանքային ծառայության ժամկետը սահմանվում է 42 ամիս:»

Հոդված 14. Այլընտրանքային ծառայություն իրականացնելն ապահովելը

«Այլընտրանքային ծառայության զորակոչը կազմակերպում եւ դրա իրականացումը վերահսկում է պաշտպանության բնագավառում Հայաստանի Հանրապետության կառավարության լիազորած պետական կառավարման մարմինը: ...»

Հոդված 17. Այլընտրանքային աշխատանքային ծառայություն անցնելու կարգը

«1. Այլընտրանքային աշխատանքային ծառայության կանչված քաղաքացին սահմանված կարգով ուղարկվում է այլընտրանքային աշխատանքային ծառայություն անցնելու վայրի կազմակերպություն:

2. Այլընտրանքային աշխատանքային ծառայություն անցնելու վայրի կազմակերպության ղեկավարն այլընտրանքային աշխատանքային ծառայողին ընդգրկում է կազմակերպության հաստիքացուցակում, որոշում է նրա աշխատանքի տեսակը, կարգն ու պայմանները՝ ապահովելով լրիվ զբաղվածություն եւ եռօրյա ժամկետում այդ մասին գրավոր տեղեկացնում է կազմակերպության գտնվելու վայրի զինվորական կոմիսարիատին:

3. Այլընտրանքային աշխատանքային ծառայողը այլ կազմակերպություն կամ այլ վայր ծառայության կարող է փոխադրվել պաշտպանության բնագավառում պետական լիազոր մարմնի համաձայնությամբ կամ նախաձեռնությամբ:

4. Այլընտրանքային աշխատանքային ծառայողը ծառայության վայրում գտնվում է շուրջօրյա: Ծառայության վայր է համարվում կազմակերպությանը տնօրինման, տիրապետման եւ օգտագործման իրավունքով պատկանող տարածքը:

5. Այլընտրանքային աշխատանքային ծառայողը ծառայության ընթացքում չի կարող նշանակվել ղեկավար պաշտոնում, ինչպես նաեւ զբաղվել այլ գործունեությամբ:

6. Այլընտրանքային աշխատանքային ծառայողները ծառայությունից պահեստ արձակվում եւ պահեստազորում հաշվառվում են օրենքով սահմանված կարգով:»

Հոդված 18. Այլընտրանքային աշխատանքային ծառայության վայրի կազմակերպության ղեկավարի պարտականությունները

«1. Այլընտրանքային աշխատանքային ծառայության վայրի կազմակերպության ղեկավարն այլընտրանքային աշխատանքային ծառայողին ապահովում է սննդով, սահմանված ձեւի արտահագուստով, ներքնաշորերով, քնելատեղով, անկողնային եւ անձնական հիգիենայի պարագաներով, ծանոթացնում է կազմակերպության աշխատանքային ներքին կարգապահական կանոններին ու կատարվող աշխատանքների առանձնահատկություններին:

2. Կազմակերպության ղեկավարը ծառայության վայրում պարտավոր է ապահովել այլընտրանքային աշխատանքային ծառայողի անվտանգությունը, հետեւել ծառայության կատարման ընթացքին, ստեղծել անհրաժեշտ պայմաններ ծառայողի հանգստի կազմակերպման եւ ընտանիքի անդամների հետ նրա տեսակցությունների համար, որոնք իրականացվում են «Զինված ուժերի ներքին ծառայության կանոնագիրքը հաստատելու մասին» Հայաստանի Հանրապետության օրենքով սահմանված կարգով:

3. Կազմակերպության ղեկավարը պատասխանատու է կազմակերպությունում այլընտրանքային աշխատանքային ծառայության կազմակերպման եւ իրականացման համար:»

Հոդված 19. Այլընտրանքային ծառայողների իրավունքները եւ պարտականությունները

«1. Այլընտրանքային ծառայողին տրվում է ամսական դրամական բավարարում՝ պարտադիր զինվորական ծառայության շարքային կազմի համար սահմանված չափով: ...

...

4. Ծառայության ընթացքում այլընտրանքային ծառայողները պարտավոր են պահպանել ծառայության ներքին կարգապահության կանոնները, կատարել իրենց պարտականությունները եւ համապատասխան ղեկավարի (հրամանատարի) հրամաններն ու հանձնարարականները, կրել սահմանված նմուշի արտահագուստ, ինքնակամ չլքել ծառայության վայրը: ...»

Հոդված 20. Այլընտրանքային զինվորական ծառայողների եւ նրանց ընտանիքների անդամների սոցիալական ապահովությունը

«1. Այլընտրանքային զինվորական ծառայողների եւ նրանց ընտանիքների անդամների սոցիալական ապահովության հարցերը կարգավորվում են «Զինծառայողների եւ նրանց ընտանիքների անդամների սոցիալական ապահովության մասին» Հայաստանի Հանրապետության օրենքով:

2. Այլընտրանքային աշխատանքային ծառայողների եւ նրանց ընտանիքների անդամների սոցիալական ապահովությունը ... իրականացվում է «Պետական կենսաթոշակների մասին» Հայաստանի Հանրապետության օրենքով սահմանված կարգով: ...»

2. 2013 թվականի մայիսի 2-ին կատարված եւ 2013 թվականի հունիսի 8-ին ուժի մեջ մտած փոփոխությունները

29. 2011 թվականի ապրիլի 28-ին առաջարկվել են փոփոխություններ «Այլընտրանքային ծառայության մասին» օրենքում: Առաջարկվող փոփոխությունների վերաբերյալ բացատրական զեկույցում նշվում էր, որ Օրենքը, որն ընդունվել էր Հայաստանի կողմից Եվրոպայի խորհրդին անդամակցելիս ստանձնած պարտավորությունները կատարելու նպատակով, չի համապատասխանում միջազգային չափանիշներին: Դրա հիմնական թերությունները հետեւյալն էին.

ա) այլընտրանքային աշխատանքային ծառայություն անցնող ծառայողների՝ զինվորական վերահսկողության ներքո գտնվելու փաստը, ինչը հակասում է նրանց կրոնական համոզմունքներին: Ընդ որում, զինվորական վերահսկողություն սահմանված էր ոչ միայն այլընտրանքային զինվորական ծառայության, այլ նաեւ այլընտրանքային աշխատանքային ծառայության

դեպքում: Սրանով այն անձինք, որոնց կրոնական համոզմունքներին հակասում են ոչ միայն զենք կրելը եւ օգտագործելը, այլեւ զինվորական վերահսկողության ներքո որեւէ ծառայություն անցնելը, պարտադիր զինվորական ծառայությունից բացի որեւէ այլընտրանք չունեն, եւ

բ) այլընտրանքային ծառայության տեւողությունը:

30. Նշված փոփոխություններն ի վերջո ընդունվել են 2013 թվականի մայիսի 2-ին եւ ուժի մեջ մտել 2013 թվականի հունիսի 8-ին: Դրանք ներառել են հետեւյալ փոփոխությունները՝

- 5-րդ հոդվածում կատարվել է փոփոխություն՝ այլընտրանքային զինվորական ծառայության տեւողությունը նվազեցնելով մինչեւ երեսուն ամիս, իսկ այլընտրանքային աշխատանքային ծառայության տեւողությունը՝ մինչեւ երեսունվեց ամիս.

- 14-րդ հոդվածում տարբերակվել է այլընտրանքային զինվորական ծառայությունը, որը պետք է կազմակերպվեր եւ վերահսկվեր պաշտպանության ոլորտում լիազորված պետական կառավարման մարմնի կողմից, եւ այլընտրանքային աշխատանքային ծառայությունը, որը պետք է կազմակերպվեր եւ վերահսկվեր Կառավարության կողմից լիազորված պետական կառավարման մարմնի կողմից: Նոր խմբագրությամբ 14-րդ հոդվածով նաեւ սահմանվել է, որ այլընտրանքային աշխատանքային ծառայությունը չի կարող վերահսկվել զինվորականների կողմից.

- 17-րդ հոդվածով այն կազմակերպության ղեկավարից, որտեղ պետք է անցնի այլընտրանքային աշխատանքային ծառայությունը, պահանջվել է ապահովել ծառայողի լիակատար զբաղվածությունը: Ծառայողի փոխադրումը կարող էր կարգադրվել կամ նախաձեռնվել հանրապետական հանձնաժողովի կողմից (տե՛ս ստորեւ՝ 35-րդ եւ 36-րդ պարբերությունները)՝ ի տարբերություն «պաշտպանության ոլորտում լիազորված պետական կառավարման մարմնի», եւ նրանից այլեւս չէր պահանջվում ծառայության վայրում գտնվել շուրջօրյա.

- 18-րդ հոդվածի 1-ին մասով այլընտրանքային ծառայություն անցնելու վայրի կազմակերպությունից այլեւս չէր պահանջվում ծառայողին տրամադրել սնունդ, համազգեստ եւ այլ պարագաներ: Նոր խմբագրությամբ 18-րդ հոդվածի 2-րդ մասից հանվել է Ջինված ուժերի ներքին ծառայության կանոնագրքին արված հղումը, եւ նոր խմբագրությամբ տեքստով կազմակերպության ղեկավարից պահանջվում էր ապահովել, որ ծառայողի աշխատանքային պայմանները լինեն այլ ժամանակավոր կամ մշտական աշխատողների համար ստեղծված պայմաններին հավասար:

Նոր խմբագրությամբ 19-րդ հոդվածի համաձայն՝ այլընտրանքային աշխատանքային ծառայողն այլեւս չէր ստանալու պարտադիր զինվորական ծառայության շարքային կազմի համար սահմանված չափով ամսական դրամական բավարարում, այլ ստանալու էր մինչեւ 30 000 ՀՀ դրամ ամսական դրամական բավարարում: Համազգեստ կրելու պարտականությունը նույնպես հանվել էր:

**Գ. «Զինվորական ծառայություն անցնելու մասին» օրենք
(2002 թվական)**

31. 4-րդ հոդվածով նախատեսվում է, որ շարքային կազմի համար պարտադիր զինվորական ծառայության ժամկետը քսանչորս ամիս է:

**Դ. «Քրեական օրենսգիրքը գործողության մեջ դնելու մասին» օրենք
(2003 թվական, փոփոխվել է 2013 թվականին)**

32. 2013 թվականի մայիսի 2-ին Օրենքում մի շարք փոփոխություններ են կատարվել: Դրանք ուժի մեջ են մտել 2013 թվականի հունիսի 8-ին եւ ներառել են հետեւյալ փոփոխությունները.

«[*inter alia*, Հայաստանի Հանրապետության քրեական օրենսգրքի 327-րդ հոդվածով] նախատեսված արարքները կրոնական համոզմունքների կամ հայացքների շարժառիթով կատարած եւ դրա համար պատիժ կրող անձանց դիմումի հիման վրա ... դատարանը վերանայում է այդ անձանց նկատմամբ կայացված դատավճիռը՝ կարճելով քրեական գործի վարույթը եւ նրանց ազատելով պատժի հետագա կրումից, եթե նրանք մինչեւ 2013 թվականի օգոստոսի 1-ը դիմում են ներկայացրել այլընտրանքային ծառայություն անցնելու վերաբերյալ, եւ «Այլընտրանքային ծառայության մասին» Հայաստանի Հանրապետության օրենքով սահմանված կարգով լիազորված մարմինը որոշում է կայացրել նրանց այլընտրանքային ծառայության ուղարկելու մասին:»:

Ե ալաստանի Հանրապետության կառավարության 2004 թվականի հունիսի 25-ի «Այլընտրանքային ծառայություն անցնելու վայրերի ցանկը եւ այլընտրանքային ծառայողի համազգեստի ձեւն ու կրելու կարգը հաստատելու մասին» թիվ 940-Ն որոշում

33. 2-րդ կետի «բ» ենթակետի համաձայն՝ այլընտրանքային աշխատանքային ծառայողներն իրենց ծառայությունն անցնում են Հայաստանի Հանրապետության առողջապահության նախարարության ու Հայաստանի Հանրապետության աշխատանքի եւ սոցիալական հարցերի նախարարության համակարգերի կազմակերպություններում, ինչպես օրինակ՝ որբանոցներում, ծերանոցներում, հոգեբուժարաններում, հաշմանդամություն ունեցող անձանց համար նախատեսված հաստատություններում եւ հիվանդանոցներում: Նրանք պետք է կատարեն սանիտարի գործառույթներ: 3-րդ կետի համաձայն՝ Հայաստանի Հանրապետության պաշտպանության նախարարին, Հայաստանի Հանրապետության աշխատանքի եւ սոցիալական հարցերի նախարարին ու Հայաստանի Հանրապետության առողջապահության նախարարին վերապահված է այլընտրանքային աշխատանքային ծառայողներին հագուստով, սննդով եւ դրամական միջոցներով ապահովելու պարտականությունը: Որոշմամբ նաեւ սահմանվում է այն համազգեստի հետ կապված կանոնները, որը պետք է կրեն այլընտրանքային զինվորական ծառայողները եւ այլընտրանքային աշխատանքային ծառայողները:

34. 2013 թվականի օգոստոսի 1-ին որոշման մեջ կատարվել են փոփոխություններ, եւ այն կիրառելի է դարձել միայն այլընտրանքային զինվորական ծառայողների նկատմամբ:

2. Հայաստանի Հանրապետության կառավարության 2005 թվականի մարտի 10-ի «Այլընտրանքային ծառայություն անցնելու մասին դիմումները քննարկող հանրապետական հանձնաժողովի ստեղծման, գործունեության կարգը եւ անդամների կազմը սահմանելու մասին» թիվ 271-Ն որոշում

35. Որոշմամբ ստեղծվել է հանրապետական հանձնաժողով՝ այլընտրանքային ծառայություն անցնելու մասին դիմումները քննարկելու համար: Հանձնաժողովի կազմում էին Հայաստանի Հանրապետության զինված ուժերի գլխավոր շտաբի պետը՝ որպես հանձնաժողովի նախագահ, Հայաստանի Հանրապետության զինվորական կոմիսարը՝ որպես հանձնաժողովի նախագահի տեղակալ, Հայաստանի Հանրապետության առողջապահության նախարարի տեղակալը, Հայաստանի Հանրապետության աշխատանքի եւ սոցիալական հարցերի նախարարի տեղակալը, Հայաստանի Հանրապետության կառավարության աշխատակազմի ազգային փոքրամասնությունների եւ կրոնի հարցերի վարչության պետը եւ Հայաստանի Հանրապետության կառավարության աշխատակազմի վարչական մարմինների վարչության պետը:

36. 2013 թվականի հուլիսի 25-ին որոշումը ճանաչվել է ուժը կորցրած եւ փոխարինվել է թիվ 797-Ա որոշմամբ, որով փոխվել է հանրապետական հանձնաժողովի կազմը՝ ներառելով ՀՀ տարածքային կառավարման նախարարի առաջին տեղակալին՝ որպես հանձնաժողովի նախագահ, ՀՀ առողջապահության նախարարի տեղակալին, ՀՀ աշխատանքի եւ սոցիալական հարցերի նախարարի տեղակալին, ՀՀ կրթության եւ գիտության նախարարի տեղակալին, ՀՀ պաշտպանության նախարարի տեղակալին, ՀՀ կառավարությանն առընթեր

ՀՀ ոստիկանության պետի տեղակալին եւ ՀՀ կառավարության աշխատակազմի ազգային փոքրամասնությունների եւ կրոնի վարչության պետին:

Է. Հայաստանի Հանրապետության զինված ուժերի գլխավոր շտաբի պետի 2004 թվականի դեկտեմբերի 20-ի թիվ 142 հրաման

37. Այլընտրանքային աշխատանքային ծառայության զորակոչված անձանց աշխատանքային կարգապահությունը վերահսկելու նպատակով Հայաստանի Հանրապետության զինվորական կոմիսարին եւ Պաշտպանության նախարարության ռազմական ոստիկանության պետին հանձնարարվել է՝ ա) տարածքային զինվորական կոմիսարիատների եւ դրանց ստորաբաժանումների տարածքում գտնվող կազմակերպություններում այլընտրանքային աշխատանքային ծառայություն անցնող անձանց ներկայությունը ստուգելու նպատակով յուրաքանչյուր շաբաթ կատարել ստուգայցեր, բ) յուրաքանչյուր ամսվա վերջին այս ստուգումների արդյունքների մասին զեկուցել Գլխավոր շտաբի պետին, եւ գ) Գլխավոր շտաբի պետին անմիջապես զեկուցել որեւէ այլընտրանքային աշխատանքային ծառայողի բացակայության դեպքում եւ նրանց գտնելու նպատակով ձեռնարկել անհրաժեշտ միջոցառումներ:

Ը. Վճռաբեկ դատարանի նախադեպային իրավունքը

38. 2014 թվականի մարտի 28-ին եւ 2015 թվականի մարտի 27-ին Վճռաբեկ դատարանը քննել է համոզմունքի հիմնավորմամբ զինվորական ծառայությունից հրաժարված երկու անձանց՝ ավելի ցածր ատյանի դատարանների կողմից Քրեական օրենսգրքի 327-րդ հոդվածով նրանց նկատմամբ կայացված մեղադրական դատավճիռների դեմ ներկայացված բողոքները (քրեական գործեր թիվ ԿԴ1/0053/01/12 եւ ԳԴ1/0006/01/13): Դատարանը գտել է, որ հաշվի առնելով, որ նրանց գործերում առկա են 2013

թվականի հունիսի 8-ին փոփոխված «Քրեական օրենսգիրքը գործողության մեջ դնելու մասին» օրենքում նշված հանգամանքները՝ այդ Օրենքի դրույթները կիրառելի են, հետեւաբար նրանց համար սահմանված պատիժները պետք է չեղյալ հայտարարել եւ քրեական գործով վարույթը կարճել՝ հանցակազմի բացակայության պատճառով:

Թ. Հայաստանի Հանրապետության մարդու իրավունքների պաշտպանը

39. Մարդու իրավունքների պաշտպանն իր 2008 թվականի տարեկան զեկույցի մեջ նշել է.

««Եհովայի վկաներ» կրոնական կազմակերպությանը հարող զինապարտները այլընտրանքային աշխատանքային ծառայության անցնելուց հրաժարումը պատճառաբանում են այն հանգամանքով, որ այդ ծառայությունը կազմակերպվում է դրա իրականացման նկատմամբ վերահսկողություն իրականացվում է ... Պաշտպանության նախարարության ... ստորաբաժանումների կողմից: Օրինակ, այլընտրանքային ծառայության զորակոչն անցկացվում է զինկոմիսարիատների միջոցով, կամ ... Պաշտպանության նախարարության ռազմական ոստիկանության [վարչությունը] պարբերաբար ստուգայցեր է կազմակերպում այլընտրանքային աշխատանքային ծառայության անցման կազմակերպություններ, այլընտրանքային ծառայողներին տողանով շարվելու պահանջ է ներկայացնում եւ այլն: Բացի այդ, որոշ զինապարտներ բողոքել են, որ այլընտրանքային աշխատանքային ծառայության համազգեստը տրամադրվում է ... Պաշտպանության նախարարության ... կողմից:

[«Այլընտրանքային ծառայության մասին» օրենքի 18-րդ հոդվածի] համաձայն՝ այլընտրանքային աշխատանքային ծառայության կազմակերպման եւ իրականացման համար պատասխանատու է այլընտրանքային աշխատանքային ծառայության վայրի կազմակերպության ղեկավարը: Միաժամանակ, [նույն Օրենքի 14-րդ հոդվածի համաձայն]՝ այլընտրանքային ծառայության զորակոչը կազմակերպում է դրա (այլընտրանքային ծառայության) իրականացումը վերահսկում է [պաշտպանության բնագավառում լիազորված պետական կառավարման մարմինը]: Իրականում, ... Պաշտպանության նախարարությունը հաստատում է [14 հոդվածի] կատարման նպատակով Ռազմական ոստիկանության կողմից պարբերաբար կատարվող ստուգայցերը եւ հայտնում է, որ այդ այցերի նպատակն է պարզել այլընտրանքային ծառայողների ներկայությունը այլընտրանքային աշխատանքային ծառայության անցման կազմակերպությունում:

Հաշվի առնելով վերը շարադրյալը՝ առաջարկում ենք օրենսդրությամբ սահմանել այլընտրանքային ծառայության համար դիմումների ներկայացման, ծառայության կազմակերպման եւ իրականացման նկատմամբ վերահսկողության նոր համակարգ, որն ամբողջությամբ կիրականացվի աշխատանքի եւ սոցիալական ապահովության ոլորտում ... իրավասու գերատեսչության կողմից: Այլընտրանքային ծառայողներին [«Զինապարտության մասին» ... օրենքով] սահմանված կարգով պահեստազորում գրանցելու փոխարեն կարելի է ստեղծել այլընտրանքային ծառայություն անցած քաղաքացիների հաշվեմատյան եւ [պահեստազորի զինգրքույկի փոխարեն] նրանց տրամադրել այլ սահմանված նմուշի գրքույկ:»:

III. ՀԱՄԱՊԱՏԱՍԽԱՆ ՄԻՋԱԶԳԱՅԻՆ ՆՅՈՒԹԵՐԸ

Ա. Եվրոպայի խորհրդի նախարարների կոմիտե

1. *«Համոզմունքի հիմնավորմամբ զինվորական ծառայությունից հրաժարվելու վերաբերյալ» թիվ R(87)8 հանձնարարական*

40. Նախարարների կոմիտեն նշել է, որ «այլընտրանքային ծառայությունը չպետք է կրի պատժիչ բնույթ: Զինվորական ծառայության համեմատությամբ դրա տեւողության համար պետք է սահմանվի ողջամիտ ժամկետ»:

2. *Անդամ պետություններին ուղղված՝ «Զինված ուժերի անդամների՝ մարդու իրավունքների վերաբերյալ» Նախարարների կոմիտեի CM/Rec(2010)4 հանձնարարական*

41. Նախարարների կոմիտեն անդամ պետություններին առաջարկել է ապահովել զինված ուժերի անդամների մտքի, խղճի եւ կրոնի ազատության ցանկացած սահմանափակման համապատասխանությունը Կոնվենցիայի 9-րդ հոդվածի 2-րդ կետին, զինապարտներին զինվորական ծառայության փոխարեն քաղաքացիական այլընտրանքային ծառայություն կատարելուց հրաժարվող անձանց կարգավիճակի շնորհումը եւ նրանց քաղաքացիական բնույթի այլընտրանքային ծառայության առաջարկումը: Սույն հանձնարարականի բացատրական հուշագրում նշվում է մասնավորապես, որ զինվորական

ծառայությունից հրաժարվող անձանց համար նախատեսված ցանկացած այլընտրանքային ծառայության տեւողությունը սովորական զինվորական ծառայության տեւողության համեմատությամբ պետք է լինի ողջամիտ: Դրանում նաեւ նշվել է, որ Սոցիալական իրավունքների եվրոպական կոմիտեն համարել է, որ այլընտրանքային ծառայության տեւողությունը զինվորական ծառայության տեւողությունից մեկուկես անգամ գերազանցելը չափից շատ է:

Բ. Եվրոպայի խորհրդի խորհրդարանական վեհաժողով (ԵԽԽՎ)

1. Ընդհանուր փաստաթղթեր

Հանձնարարական թիվ 1518 (2001). Եվրոպայի խորհրդի անդամ պետություններում համոզմունքի հիմնավորմամբ զինվորական ծառայությունից հրաժարվելու իրավունքի իրացումը

42. ԵԽԽՎ-ն առաջարկել է Նախարարների կոմիտեին հրավիրել այն անդամ պետություններին, որոնք իրենց օրենսդրության մեջ դեռեւս չեն ներդրել լիարժեք քաղաքացիական բնույթ ունեցող այլընտրանքային ծառայության համակարգ, ներդնել այդպիսի համակարգ, որը բնույթով ոչ պատժիչ է, ոչ էլ արժանապատվությունը նվաստացնող:

2. Բացառապես Հայաստանին վերաբերող փաստաթղթերը

ա) Եզրակացություն թիվ 221(2000). Եվրոպայի խորհրդին անդամակցելու համար Հայաստանի դիմումը

43. ԵԽԽՎ-ն նշել է, որ Հայաստանը պարտավորվել է կատարել հետեւյալ հանձնառությունը՝ «անդամակցությունից հետո երեք տարվա ընթացքում ընդունել եվրոպական չափանիշներին համապատասխան այլընտրանքային ծառայության մասին օրենք եւ միաժամանակ ներում շնորհել կարգապահական գումարտակներում ազատազրկման կամ ծառայելու դատապարտված՝ համոզմունքի հիմնավորմամբ զինվորական ծառայությունից հրաժարված

անձանց՝ նրանց հնարավորություն տալով այլընտրանքային ծառայության մասին օրենքի ընդունման դեպքում ընտրություն կատարելու չզինված զինվորական ծառայության եւ այլընտրանքային քաղաքացիական ծառայության միջեւ»:

բ) Բանաձեւ 1532 (2007). Հայաստանի ստանձնած պարտավորությունները եւ հանձնառությունները

44. Ինչ վերաբերում է Հայաստանի՝ «Եվրոպական չափանիշներին համապատասխան» այլընտրանքային ծառայության վերաբերյալ օրենսդրություն ընդունելու եւ «ազատագրկման դատապարտված՝ համոզմունքի հիմնավորմամբ զինվորական ծառայությունից հրաժարված բոլոր անձանց ներում շնորհելու» հանձնառությանը, ԵԽԽՎ-ն հիասթափությամբ նշել է, որ 2005 թվականին եւ համապատասխանաբար 2006 թվականի հունիսին փոփոխված գործող օրենքով համոզմունքի հիմնավորմամբ զինվորական ծառայությունից հրաժարվող անձանց դեռեւս չի առաջարկվում «իրականում լիարժեք քաղաքացիական բնույթ ունեցող այլընտրանքային ծառայության» որեւէ երաշխիք, որը պետք է չկրի արժանապատվությունը նվաստացնող կամ պատժիչ բնույթ»՝ Եվրոպայի խորհրդի չափանիշներով սահմանված կարգով: Այն խորապես մտահոգված է այն հանգամանքով, որ լիարժեք քաղաքացիական ծառայության բացակայության պատճառով տասնյակ անձինք, մեծ մասամբ Եհովայի վկաներ, որոնք համոզմունքների հիմնավորմամբ հրաժարվում են զինվորական ծառայությունից, շարունակում են ազատագրկված մնալ, քանի որ նախընտրում են իրենց պատիժը կրել քրեակատարողական հիմնարկում, քան լիարժեք քաղաքացիական բնույթ չունեցող այլընտրանքային ծառայություն անցնել: ԵԽԽՎ-ն հորդորում է Հայաստանի Հանրապետության իշխանություններին փոփոխություններ կատարել «Այլընտրանքային ծառայության մասին» օրենքում՝ Եվրոպայի խորհրդի փորձագետների կողմից արված առաջարկություններին համապատասխան, եւ

միաժամանակ ներում շնորհել քրեակատարողական հիմնարկներում պատիժ կրող՝ համոզմունքի հիմնավորմամբ զինվորական ծառայությունից հրաժարված անձանց:

Գ. Ռասիզմի եւ անհանդուրժողականության դեմ եվրոպական հանձնաժողով (ՌԱԵՀ)

45. ՌԱԵՀ-ն Հայաստանի մասին 2006 թվականի հունիսի 30-ին ընդունված իր երկրորդ զեկույցում նշել է հետեւյալը.

«Հայաստանում համոզմունքի հիմնավորմամբ զինվորական ծառայությունից հրաժարված անձանց գերակշիռ մեծամասնությունը Եհովայի վկաներն են: Հետեւաբար նրանց վրա անհամաչափորեն տարածվում է այլընտրանքային ծառայության խնդիրը: Այս հարցի առնչությամբ Հայաստանի Հանրապետության խորհրդարանը 2003 թվականի դեկտեմբերի 1-ին ընդունել է [«Այլընտրանքային ծառայության մասին» օրենքը], որն ուժի մեջ է մտել 2004 թվականի հուլիսի 1-ին: Սույն օրենքով այլընտրանքային զինվորական ծառայության համար նախատեսվում է 36 ամիս ժամկետ, իսկ այլընտրանքային քաղաքացիական ծառայության համար՝ 42 ամիս: ՌԱԵՀ-ը նշում է, որ այլընտրանքային քաղաքացիական ծառայությունը, որի տեսողությունը, ի տարբերություն իրական զինվորական ծառայության, ավելի երկար է, իրականացվում է զինվորական վերահսկողության ներքո: Ընդ որում, ՌԱԵՀ-ը տեղեկացվել է, որ այն կազմակերպությունների (այդ թվում՝ հիվանդանոցների) տնօրենները, որտեղ համոզմունքի հիմնավորմամբ զինվորական ծառայությունից հրաժարվող անձինք կատարում են իրենց պարտականությունը, իրենց ծառայության իրականացման պայմանների եւ եղանակների մասին հրահանգներ ստանում են զինվորական մարմիններից: Ավելին, համոզմունքի հիմնավորմամբ զինվորական ծառայությունից հրաժարվող անձինք բժշկական օգնություն ստանալու համար ուղարկվում են զինվորական հոսպիտալ, հիմնականում գտնվում են իրենց ծառայության վայրում, եւ նրանցից պահանջվում է կրել զինվորական համազգեստ: Նրանք նաեւ ստանում են զինվորականների կողմից հաստատված կարգացուցակները եւ դրանց փոփոխությունները: ... ՌԱԵՀ-ը ցանկանում է նշել, որ [«Այլընտրանքային ծառայության մասին» օրենքի] նպատակն է բացառել համոզմունքի հիմնավորմամբ զինվորական ծառայությունից հրաժարվող անձանց զինվորական ծառայություն անցնելուց հրաժարվելու համար ազատագրելը: Սակայն [«Այլընտրանքային ծառայության մասին»

օրենքի] նպատակը, ցավոք, մնացել է անկատար, քանի որ մեծ թվով մարդիկ այժմ գտնվում են քրեակատարողական հիմնարկներում՝ ծառայության վրա զինվորականների ազդեցության պատճառով այլընտրանքային քաղաքացիական ծառայությունը թողնելու կամ այն անցնելուց հրաժարվելու համար»:

Դ. Եվրոպայի խորհրդի՝ մարդու իրավունքների հանձնակատար

46. Հանձնակատարը 2011 թվականի հունվարի 18-ից 21-ը Հայաստան կատարած այցից հետո 2011 թվականի մայիսի 9-ին ներկայացրած իր զեկույցում նշել է.

«Համոզմունքի հիմնավորմամբ զինվորական ծառայությունից հրաժարված ազատագրված անձանց խնդիրը, որոնք բոլորն էլ ներկայումս Եհովայի վկաներ են, երկար տարիներ եղել է քննարկման հարց: Համոզմունքի հիմնավորմամբ զինվորական ծառայությունից հրաժարված անձինք չեն ցանկանում անցնել այլընտրանքային ծառայություն, որը զինվորականների վերհսկողության տակ է: Հայաստանում դեռեւս գոյություն չունի զինվորական ծառայությանն այլընտրանք հանդիսացող այնպիսի ծառայություն, որը կարելի է իր բնույթով համարել լիարժեք քաղաքացիական ծառայություն: Հանձնակատարը խորապես համոզված է, որ համոզմունքի հիմնավորմամբ զինվորական ծառայությունից հրաժարվող անձինք չպետք է ազատագրվեն, եւ կոչ է անում իշխանություններին ստեղծել այլընտրանքային քաղաքացիական ծառայություն:

...

Համոզմունքի հիմնավորմամբ զինվորական ծառայությունից հրաժարվելու իրավունքի հարցը Հայաստանում դեռեւս մնում է չլուծված: Համոզմունքի հիմնավորմամբ զինվորական ծառայությունից հրաժարվողները, որոնք դիմում են քաղաքացիական ծառայություն անցնելու խնդրանքով, հիմնականում Եհովայի վկաների համայնքի անդամներ են: Գրեթե 70 մարդ ներկայումս գտնվում է ազատագրկման մեջ՝ զինվորական ծառայություն կամ այլընտրանքային զինվորական ծառայություն անցնելուց հրաժարվելու համար: Համոզմունքի հիմնավորմամբ զինվորական ծառայությունից հրաժարվողները բոլորը դատապարտվել են ՀՀ քրեական օրենսգրքի 327.1 հոդվածով՝ 24-36 ամիս ազատագրկման:

«Այլընտրանքային ծառայության մասին» օրենքն ընդունվել է 2003 թվականին եւ ուժի մեջ է մտել 2004 թվականին: Այլընտրանքային ծառայության իրականացումը շարունակում է մնալ զինվորականների վերահսկողության ներքո, ինչը, հաշվի առնելով նրանց կրոնական

համոզմունքները, մեծ խոչընդոտ է Եհովայի վկաների համայնքի անդամների համար: Մեկ այլ խնդիր է քաղաքացիական ծառայության համար սահմանված՝ պոտենցիալ պատժիչ բնույթ ունեցող տեղողությունը, որը ներկայումս 42 ամիս է, այն դեպքում, երբ պարտադիր զինվորական ծառայության տեղողությունը 24 ամիս է: Այս առումով Եվրոպայի խորհրդի սոցիալական իրավունքների եվրոպական կոմիտեն գտել է, որ այլընտրանքային ծառայության համար նախատեսված ժամկետը, որը զինվորական ծառայության ժամկետից երկու անգամ ավելի է, չափազանց երկար է եւ հակասում է Եվրոպական սոցիալական խարտիայի 1.2 հոդվածին: Համաձայն այդ հոդվածի՝ այլընտրանքային ծառայության ժամկետը չի կարող գերազանցել զինված զինվորական ծառայության ժամկետն ավելի, քան մեկուկես անգամ:

Հանձնակատարի հետ հանդիպման ընթացքում Պաշտպանության նախարարության պաշտոնատար անձինքը [«Այլընտրանքային ծառայության մասին» օրենքում] փոփոխություններ կատարելու պատրաստակամություն են հայտնել: Մասնավորապես, Նախարարը նշել է, որ փոփոխությունների համաձայն՝ վերահսկողությունը կիրականացվի այլընտրանքային ծառայության համար նախանշված նախարարության կողմից (աշխատանքի, առողջապահության, պաշտպանության եւ այլն)՝ այսպիսով ապահովելով լիարժեք քաղաքացիական ծառայության առկայությունը: Կառավարությունն ընդունել է [«Այլընտրանքային ծառայության մասին» օրենքում] փոփոխություններ կատարելու մասին օրենքի նախագիծը 2011 թվականի ապրիլին:

Եզրակացություններ եւ առաջարկություններ

...

Հանձնակատարը գտնում է, որ անհապաղ անհրաժեշտ է վերանայել [«Այլընտրանքային ծառայության մասին» օրենքը] եւ համապատասխան մեխանիզմներ մշակել՝ Հայաստանում լիարժեք քաղաքացիական ծառայության հնարավորություն ստեղծելու համար: Հաշվի առնելով զինվորական ծառայության տեղողությունը՝ կարելի է նաեւ փոփոխել այլընտրանքային ծառայության ժամկետն այնպես, որ վերջինս չկրի պատժիչ, անձի պատիվը կամ արժանապատվությունը նվաստացնող բնույթ»:

47. Հանձնակատարի զեկույցին արված պաշտոնական պատասխանում Կառավարությունն ընդունել է այն հանգամանքը, որ համոզմունքի հիմնավորմամբ զինվորական ծառայությունից հրաժարվելու իրավունքի իրացման հետ կապված՝ Հայաստանում դեռեւս առկա են խնդիրներ, եւ իրենք նպատակ ունեն ներկայացնելու օրենսդրական փոփոխություններ՝ այլընտրանքային

ծառայության նկատմամբ քաղաքացիական հսկողությունը խթանելու եւ այդպիսի ծառայության նկատմամբ զինվորական վերահսկողությունն ամբողջությամբ վերացնելու համար: Այդ գործառույթը պետք է վերապահվեր Առողջապահության նախարարության, Աշխատանքի եւ սոցիալական հարցերի նախարարության ներկայացուցիչներից եւ Պաշտպանության նախարարության միայն քաղաքացիական ծառայողներից կազմված նոր մարմնին:

Ե. Սոցիալական իրավունքների եվրոպական կոմիտե

48. Սոցիալական իրավունքների եվրոպական կոմիտեն Եվրոպական սոցիալական խարտիայի 1-ին հոդվածի 2-րդ պարբերությանը (Աշխատանքի իրավունքը. աշխատողի՝ իր կողմից ազատ ընտրված աշխատանքով իր ապրուստը վաստակելու իրավունքի արդյունավետ պաշտպանությունը) Հունաստանի համապատասխանության վերաբերյալ 2008 թվականի հոկտեմբերի 28-ին արված իր XIX-1 եզրահանգումներում նշել է.

«Կոմիտեն նշում է, որ [զինված զինվորական ծառայությունը փոխարինելու նպատակով այլընտրանքային ծառայության ժամկետը] գրեթե երկու անգամ ավելի է, քան զինված զինվորական ծառայության տեւողությունը: Պետք է ընդունել այն փաստը, որ մի շարք երկրներում, որտեղ ճանաչվել են համոզմունքի հիմնավորմամբ զինվորական ծառայությունից հրաժարվող անձանց իրավունքները, նրանք գտնվում են ավելի լավ վիճակում՝ ի տարբերություն այն երկրների, որտեղ նրանց չի շնորհվում հատուկ կարգավիճակ կամ որտեղ ծառայությունից հրաժարվելը պատժվում է ազատազրկմամբ: Սակայն, նույնիսկ եթե պետությունն ընդունում է համոզմունքի հիմնավորմամբ զինվորական ծառայությունից հրաժարվելու սկզբունքը եւ փոխարենը ստեղծում է այլընտրանքային ծառայություն, դրա համար նախատեսված ժամկետն այն չի կարող սահմանել ավելի երկար, քան անհրաժեշտ է ապահովելու համար, որ համոզմունքի հիմնավորմամբ ծառայությունից հրաժարումը համապատասխանի իրականությանը, եւ այլընտրանքային ծառայության տարբերակն ընտրելը ոչ թե դիտարկվի որպես նախընտրելի, այլ որպես պարտականություն: Խարտիայի 1-ին հոդվածի 2-րդ պարբերության համաձայն՝ այլընտրանքային ծառայության ժամկետը չի կարող գերազանցել զինված զինվորական ծառայության ժամկետն ավելի, քան մեկուկես անգամ»:

ԻՐԱՎՈՒՆՔԸ

1. ԿՈՆՎԵՆՑԻԱՅԻ 9-ՐԴ ՀՈԴՎԱԾԻ ԵՆԹԱԴՐՅԱԼ ԽԱԽՏՈՒՄԸ

49. Դիմումատուները բողոք են ներկայացրել այն մասին, որ իրենց նկատմամբ քրեական գործով վարույթ հարուցելով եւ իրենց դատապարտելով՝ խախտվել են Կոնվենցիայի 9-րդ հոդվածով երաշխավորված իրենց իրավունքները, որն ունի հետեւյալ բովանդակությունը.

«1. Յուրաքանչյուր ոք ունի մտքի, խղճի եւ կրոնի ազատության իրավունք. այս իրավունքը ներառում է իր կրոնը կամ համոզմունքը փոխելու ազատությունը եւ դրանք ինչպես միանձնյա, այնպես էլ այլոց հետ համատեղ եւ հրապարակավ կամ մասնավոր կարգով, քարոզչության, արարողությունների, պաշտամունքի եւ ծեսերի միջոցով արտահայտելու ազատություն:

2. Սեփական կրոնը կամ համոզմունքները դավանելու ազատությունը ենթակա է միայն այնպիսի սահմանափակումների, որոնք սահմանված են օրենքով եւ անհրաժեշտ են ժողովրդավարական հասարակությունում՝ ի պաշտպանություն հասարակական անվտանգության, հասարակական կարգի, առողջության կամ բարոյականության կամ այլ անձանց իրավունքների եւ ազատությունների:»:

Ա. Ընդունելիությունը

50. Կառավարությունը պնդել է, որ դիմումատուները չեն սպառել իրավական պաշտպանության ներպետական միջոցները: Մասնավորապես, 2013 թվականի մայիսի 2-ին փոփոխություններ են կատարվել «Քրեական օրենսգիրքը գործողության մեջ դնելու մասին» օրենքում, որոնց համաձայն՝ ա) Քրեական օրենսգրքի 327-րդ հոդվածով պատիժ կրող անձն ազատ է արձակվում, եթե նա մինչեւ 2013 թվականի օգոստոսի 1-ը դիմում է ներկայացրել այլընտրանքային ծառայություն անցնելու վերաբերյալ, եւ նրա դիմումը բավարարվել է, բ) կարճվում են նախաքննության եւ հետաքննության մարմինների վարույթներում գտնվող

գործերը, գ) նրանց դատվածությունը հանվում է, եւ դ) այլընտրանքային ծառայության ժամկետը նվազեցվում է՝ պատիժը փաստացի կրած ժամկետին կամ քրեական հետապնդման ընթացքում ազատությունից զրկելու ժամկետին համապատասխան: Այդ փոփոխություններն ընդունվելուց հետո Վճռաբեկ դատարանը բեկանել է համոզմունքի հիմնավորմամբ զինվորական ծառայությունից հրաժարված անձանց նկատմամբ կայացված մի շարք մեղադրական դատավճիռներ եւ հանցակազմի բացակայության պատճառով կարճել է քրեական գործով վարույթները: Փոփոխությունները կատարվել են այն ժամանակ, երբ դիմումատուները դեռեւս կրում էին իրենց պատիժները: Հետեւաբար նրանք ունեցել են արդարացման եւ վերականգնման միջոցով պատշաճ փոխհատուցման հնարավորություն, եթե նրանք մինչեւ սահմանված ժամկետը ներկայացնեին այլընտրանքային ծառայություն անցնելու դիմում, սակայն նրանք չեն օգտվել այդ հնարավորությունից:

51. Դիմումատուները վիճարկել են Կառավարության՝ իրավական պաշտպանության միջոցները չսպառելու վերաբերյալ պնդումը եւ պնդել են, որ փոփոխված «Քրեական օրենսգիրքը գործողության մեջ դնելու մասին» օրենքի դրույթներն իրավական պաշտպանության արդյունավետ միջոցներ չեն, քանի որ դրանցով չի ապահովվում լիարժեք վերականգնման կամ փոխհատուցման վճարման հնարավորություն: Նրանց պատժի մնացած մասը այլընտրանքային ծառայությամբ փոխարինելը կհանգեցնէր այնպիսի իրավիճակի, երբ քրեակատարողական հիմնարկում քսանչորս ամիս պատիժ կրելուց հետո նրանք դեռեւս ստիպված կլինեին եւս քսան ամիս անցնել այլընտրանքային ծառայություն, քանի որ ազատագրկման մեկ ամբողջ օրը հավասարազոր էր այլընտրանքային ծառայության մեկ ութժամյա աշխատանքային օրվան: Այդպիսի օրակարգը պատժիչ բնույթ ուներ եւ նման էր ազատագրման իրենց ժամկետը ազատության հետ չկապված պատժով փոխարինելուն, բացի այդ, երեսուն ամիս սահմանված իրենց պատիժը երկարաձգվում էր մինչեւ երեսունվեց ամիս, ինչը չէր կարող համարվել արդարացում կամ վերականգնում: Ավելին, Կառավարությունը

չի հրապարակել այն տեղեկատվությունը, որ հանրապետական հանձնաժողովը, որին վստահված էր այլընտրանքային ծառայություն անցնելու մասին դիմումների վերաբերյալ որոշում կայացնելու հարցը, իր գործունեությունը սկսել է փոփոխությունները կատարելուց ամիսներ անց՝ իր առաջին նիստն անցկացնելով 2013 թվականի հոկտեմբերի 23-ին: Մինչ այդ դիմումատուներն արդեն ազատ էին արձակվել քրեակատարողական հիմնարկից:

52. Դատարանը համարում է, որ Կառավարության՝ իրավական պաշտպանության ներպետական միջոցների սպառման վերաբերյալ առարկությունը սերտորեն կապված է դիմումատուների բողոքի բովանդակության հետ եւ պետք է միացվի գործի ըստ էության քննությանը:

53. Ավելին, չնայած կողմերը չեն վիճարկել գործի նկատմամբ 9-րդ հոդվածի կիրառելիության հարցը, սակայն Դատարանն անհրաժեշտ է համարում իր իսկ նախաձեռնությամբ անդրադառնալ այս հարցին: Այս կապակցությամբ այն կրկին նշում է, որ բանակում ծառայության պարտավորության եւ անձի խղճի կամ խորը եւ իրականում դավանվող կրոնական կամ այլ համոզմունքների միջեւ ի հայտ եկած լուրջ եւ անհաղթահարելի հակասությամբ պայմանավորված՝ զինվորական ծառայությանը դեմ լինելը համարվում է բավականաչափ համոզիչ, ծանրակշիռ, փոխկապակցված եւ կարելուք համոզմունք՝ 9-րդ հոդվածի երաշխիքները կիրառելու համար: Զինվորական ծառայությանը առարկելու հանգամանքի վրա տվյալ դրույթի գործողության տարածման հարցը եւ դրա չափը պետք է որոշվի՝ հաշվի առնելով այդ գործի առանձին հանգամանքները (տե՛ս *Բայատյանն ընդդեմ Հայաստանի* [ՄՊ] [*Bayatyan v. Armenia* [GC]]), թիվ 23459/03, § 110, ՄԻԵԴ 2011, *Էրչեպն ընդդեմ Թուրքիայի* [*Ercep v. Turkey*], թիվ 43965/04, § 47, 2011 թվականի նոյեմբերի 22, *Սավդան ընդդեմ Թուրքիայի* [*Savda v. Turkey*], թիվ 42730/05, § 91, 2012 թվականի հունիսի 12, եւ *Պապավասիլակիսն ընդդեմ Հունաստանի* [*Papavasilakis v. Greece*], թիվ 66899/14, § 36, 2016 թվականի սեպտեմբերի 15):

54. Սույն գործում դիմումատուները Եհովայի վկաներ են՝ կրոնական խմբավորում, որոնք այն համոզմունքն ունեն, որ անընդունելի է զինվորականների շրջանում նույնիսկ չզինված ծառայությունը: Արդեն իսկ հաստատվել է զինվորական ծառայությանն այդպիսի առարկման նկատմամբ 9-րդ հոդվածի կիրառելիության փաստը (տե՛ս *Բայաթյանի* գործը՝ վերելում հիշատակված, § 111): Այնուամենայնիվ, ի տարբերություն *Բայաթյանի* գործի՝ սույն գործով դիմումատուներն առարկել են ոչ միայն զինվորական ծառայություն, այլև փոխարինող ծառայություն անցնելուն, որը Հայաստանում առկա է 2004 թվականից՝ պնդելով, որ այն լիարժեք քաղաքացիական բնույթ չունի եւ կրում է պատժիչ բնույթ: Հաշվի առնելով գործի բոլոր փաստական հանգամանքները՝ Դատարանը որեւէ պատճառ չունի կասկածի տակ առնելու այն հանգամանքը, որ դիմումատուների կողմից թե՛ զինվորական, թե՛ այլընտրանքային ծառայությանն առարկելը պայմանավորված է իրենց՝ իրականում դավանվող կրոնական համոզմունքներով, որոնք լրջորեն եւ անհաղթահարելիորեն հակասում են այդ ծառայությունն անցնելու իրենց պարտավորությանը: Հետեւաբար 9-րդ հոդվածը կիրառելի է դիմումատուների գործի նկատմամբ:

55. Դատարանը նշում է, որ այս բողոքը, Կոնվենցիայի 35-րդ հոդվածի 3-րդ կետի «ա» ենթակետի իմաստով, ակնհայտ անհիմն չէ: Դատարանն այնուհետեւ նշում է, որ այն անընդունելի չէ որեւէ այլ հիմքով: Հետեւաբար, այն պետք է հայտարարվի ընդունելի:

Բ. Ըստ էության քննությունը

1. Կողմերի փաստարկները

ա) Դիմումատուն

56. Դիմումատուները պնդել են, որ այլընտրանքային աշխատանքային ծառայությունը լիարժեք քաղաքացիական բնույթ չի կրել՝ նշելով իրենց

բողոքներում այդ կապակցությամբ բերված փաստարկները (տե՛ս վերելում՝ 21-րդ պարբերությունը): Չնայած այն հանգամանքին, որ այլընտրանքային աշխատանքային ծառայողի համար սահմանված ֆիզիկական աշխատանքը տեխնիկապես կատարվել է քաղաքացիական հիմնարկներում, ծրագրի հետ կապված յուրաքանչյուր հարց եւ ծառայողի բոլոր գործողությունները գտնվել են զինվորականների հսկողության ու վերահսկողության ներքո: Զինվորական մարմինները կարող էին այլընտրանքային աշխատանքային ծառայողին ըստ ցանկության ներառել մեկ այլ կարգացուցակում: Նրանից պահանջվում էր իր ծառայության վայրում լինել օրը քսանչորս ժամ, շաբաթը յոթ օր, եւ նրան կարգադրված էր կրել զինվորական մարմինների կողմից տրամադրված համազգեստ, որը տեսքով հիշեցնում էր զինվորական համազգեստ: Այլընտրանքային աշխատանքային ծառայողի գրքույկի կազմի վրա առկա էր զինվորական տարբերակիչ նշան, եւ ծառայությունն ավարտելուն պես նա ազատ էր արձակվում եւ հաշվառվում զինվորական պահեստազորում: Սահմանված կարգի ցանկացած խախտում պատժվում էր զինվորական կանոններին համապատասխան, եւ այլընտրանքային աշխատանքային ծառայողին տրված ցանկացած հրաման պետք է կատարվեր «Զինված ուժերի ներքին ծառայության կանոնագիրքը հաստատելու մասին» օրենքով սահմանված կարգով: Ցանկացած պարագայում այլընտրանքային աշխատանքային ծառայողը ենթարկվում էր զինվորական մարմնին եւ կարգապահական կանոններին: Այսպիսով, չի կարելի ասել, որ այլընտրանքային աշխատանքային ծառայությունը բովանդակում է զինվորական վերահսկողության միայն մի քանի ֆորմալ տարր, ինչպես պնդում է Կառավարությունը (տե՛ս ստորել՝ 58-րդ պարբերությունը): Իրականում, հիմք ընդունելով նրանց կրոնական համոզմունքները, դա նույնն է, ինչ չզինված զինվորական ծառայությունը:

57. Ավելին, դիմումատուները նշել են այն փաստը, որ ավելի ուշ օրենքում կատարվել են փոփոխություններ՝ պնդելով, որ Կառավարությունն ընդունել է դրանում հիմնարար խնդիրների առկայության փաստը: Փոփոխություններն

առաջարկելիս հայտնաբերված հիմնական թերություններից մեկն այն էր, որ այլընտրանքային աշխատանքային ծառայությունը գտնվում է զինվորականների հսկողության ներքո: Մինչևե այս փոփոխությունները Հայաստանում իրականում գոյություն չի ունեցել լիովին քաղաքացիական բնույթ ունեցող այլընտրանքային ծառայություն: ԵԽԽՎ-ն եւ Նախարարների կոմիտեն պարբերաբար կոչ են արել Հայաստանի իշխանություններին ներդնել լիովին քաղաքացիական ծառայության համակարգ: Դիմումատուները նշել են, որ զինվորական հսկողությունն ու վերահսկողությունը վերացնելու եւ ծրագիրը միայն քաղաքացիական մարմինների կառավարմանը հանձնելու նպատակով 2013 թվականին օրենքում փոփոխություններ կատարելու հանգամանքով նաեւ հաստատվում է, որ ժողովրդավարական հասարակության մեջ նրանց հետապնդելու եւ ազատագրելու անհրաժեշտությունը բացակայում էր:

բ) Կառավարությունը

58. Կառավարությունը նշել է, որ 2003 թվականին Հայաստանն ընդունել է այլընտրանքային ծառայության մասին օրենք՝ որպես Եվրոպայի խորհրդին անդամակցելիս ստանձնած հանձնառությունների մաս: Ցավոք, պարզվել է, որ այդ օրենքում առկա են մի շարք բացթողումներ եւ եվրոպական չափանիշներին անհամապատասխանություններ: Այնուամենայնիվ, դիմումատուների քրեական գործով որոշում կայացնելիս ներպետական դատարանները պարտավոր էին կիրառել տվյալ ժամանակահատվածում ուժի մեջ գտնվող օրենքը: Հղում կատարելով Վերաքննիչ քրեական դատարանի եզրահանգումներին՝ Կառավարությունը պնդել է, որ տվյալ ժամանակահատվածում առկա այլընտրանքային աշխատանքային ծառայությունը քաղաքացիական բնույթ է կրել եւ տեսականորեն պարունակել է զինվորական վերահսկողության միայն մի քանի ֆորմալ տարր, իսկ գործնականում ուղղակիորեն չի գտնվել զինվորականների հսկողության ներքո: Այսպիսով, միջամտությունն օրինաչափ է եղել եւ սահմանված է եղել օրենքով:

59. Կառավարությունը նաեւ նշել է, որ սույն գործը պետք է տարբերակել *Բայաթյանի* գործից, քանի որ սույն գործով դիմումատուները ունեցել են զինվորական ծառայությունը քաղաքացիական բնույթ կրող այլընտրանքային ծառայությամբ փոփոխինելու հնարավորություն: Այնուամենայնիվ, հաշվի առնելով *Բայաթյանի* գործով կայացված վճռով նախադեպային իրավունքում կատարված փոփոխությունները եւ տարբեր միջազգային մարմինների, այդ թվում՝ Վենետիկի հանձնաժողովի կողմից ներկայացված մի շարք եզրակացություններ ու առաջարկություններ՝ 2013 թվականի մայիսի 2-ին ներպետական օրենսդրությունը ենթարկվել է փոփոխության այն անձանց համար հնարավորություն ստեղծելու նպատակով, որոնք դեմ են ոչ միայն զենք կրելուն կամ այլ ռազմական գործողություններ կատարելուն, այլեւ ընդհանրապես որեւէ զինվորական հրամանատարության ներքո ծառայություն անցնելուն: Ամփոփելով կարելի է նշել, որ մտքի, խղճի կամ կրոնի ազատության իրավունքի իրացմանը որեւէ միջամտություն չի եղել, եւ Կոնվենցիայի 9-րդ հոդվածի խախտում տեղի չի ունեցել:

2. Դատարանի գնահատականը

ա) Արդյոք տեղի է ունեցել միջամտություն

60. Միջամտության առկայության վերաբերյալ Կառավարությունը ներկայացրել է հակասական փաստարկներ՝ պնդելով, մի կողմից, որ «միջամտությունն իրավաչափ է եղել եւ սահմանված է եղել օրենքով», իսկ մյուս կողմից, որ որեւէ միջամտություն չի եղել: Ցանկացած պարագայում Դատարանը համարում է, որ դիմումատուներին՝ զինվորական եւ այլընտրանքային ծառայության զորակոչվելուց հրաժարվելն իրենց կրոնական համոզմունքների արտահայտումն է եւ զորակոչից խուսափելու համար նրանց դատապարտելը հավասարազոր է 9-րդ հոդվածի 1-ին կետով երաշխավորված իրենց կրոնի դավանման ազատությանը միջամտելուն (տե՛ս *mutatis mutandis* (համապատասխան փոփոխություններով) *Բայաթյանի* գործը՝ վերելում

հիշատակված, § 112): Այդպիսի միջամտությունը հակասում է 9-րդ հոդվածին՝ բացառությամբ այն դեպքերի, երբ դա «սահմանված է օրենքով», հետապնդում է 2-րդ կետով սահմանված մեկ կամ ավելի իրավաչափ նպատակ եւ «անհրաժեշտ է ժողովրդավարական հասարակությունում» (տե՛ս, ի թիվս այլ վճիռների, *Իզեթին Դոդանը եւ այլք ընդդեմ Թուրքիայի* [ՄՊ] [*İzzettin Doğan and Others v. Turkey* [GC]], թիվ 62649/10, § 98, ՄԻԵԴ 2016):

բ) Արդյո՞ք միջամտությունը հիմնավորված էր

i) Օրենքով սահմանված լինելը եւ իրավաչափ նպատակը

61. Կողմերի միջեւ առկա չէ վեճ այն հարցի վերաբերյալ, թե արդյոք միջամտությունը սահմանված է եղել օրենքով եւ ունեցել է իրավաչափ նպատակ:

62. Դատարանը անհրաժեշտ չի համարում լուծել այս հարցը, քանի որ միջամտությունն ամեն դեպքում չէր համապատասխանում 9-րդ հոդվածին՝ ստորեւ ներկայացված պատճառներով (տե՛ս, *mutatis mutandis*, *Բայաթյանի* գործը՝ վերելում հիշատակված, §§ 113-117):

ii) Անհրաժեշտ են ժողովրդավարական հասարակությունում

ա) Ընդհանուր սկզբունքները

63. Դատարանը կրկին նշում է, որ ինչպես սահմանված է 9-րդ հոդվածով, մտքի, խղճի եւ կրոնի ազատությունը Կոնվենցիայի իմաստով «ժողովրդավարական հասարակության» հիմնաքարերից մեկն է: Այս ազատությունն իր կրոնական իմաստով հավատացյալների ինքնությունը եւ կյանքի վերաբերյալ նրանց պատկերացումները կազմող կարելորագույն տարրերից մեկն է, սակայն այն նաեւ արժեքավոր երեւույթ է աթեիստների, ագնոստիկների, սկեպտիկների եւ անտարբեր անձանց համար: Ժողովրդավարական հասարակության անքակտելի մաս կազմող բազմակարծությունը, որը դարեր շարունակ սերմանվել է, պայմանավորված է

դրանով: Այդ ազատությունը ենթադրում է, *inter alia*, կրոնական համոզմունքներ ունենալը կամ չունենալը եւ որեւէ կրոն դավանելը կամ չդավանելը (տե՛ս *Բուսկարինին եւ այլք ընդդեմ Սան Մարինոյի* [ՄՊ] [*Buscarini and Others v. San Marino* [GC]], թիվ 24645/94, § 34, ՄԻԵԴ 1999-Ի, *Լեյլա Շահինն ընդդեմ Թուրքիայի* [ՄՊ] [*Leyla Şahin v. Turkey* [GC]], թիվ 44774/98, § 104, ՄԻԵԴ 2005-XI, եւ *Բայաթյանի* գործը՝ վերելում հիշատակված, § 118):

64. Չնայած կրոնական ազատությունն ի սկզբանե պայմանավորված է անհատական գիտակցությամբ, սակայն այն նաեւ ենթադրում է, *inter alia*, սեփական կրոնը դավանելու ազատություն՝ միանձնյա եւ առանձին կամ այլ անձանց հետ միասին, հրապարակայնորեն կամ միեւնոյն կրոնը դավանող այլ անձանց շրջանում: 9-րդ հոլաձում նշված են մի շարք ձեւեր, որով կրոնի կամ համոզմունքի արտահայտումը կարող է դրսեւորվել, մասնավորապես՝ քարոզչություն, արարողություններ, պաշտամունք եւ ծես (տե՛ս *Հասանը եւ Չաուշն ընդդեմ Բուլղարիայի* [ՄՊ] [*Hasan and Chaush v. Bulgaria* [GC]], թիվ 30985/96, § 60, ՄԻԵԴ 2000-XI, եւ *Բայաթյանի* գործը՝ վերելում հիշատակված, § 119):

65. Իր՝ ձեւավորված նախադեպային իրավունքի համաձայն՝ Դատարանը միջամտության անհրաժեշտությունը եւ դրա չափը որոշելու հարցում Կոնվենցիայի կողմ հանդիսացող պետություններին վերապահում է հայեցողական լիազորությունների որոշակի շրջանակ: Այնուամենայնիվ, հայեցողական լիազորությունների այս շրջանակը սերտորեն փոխկապակցված է եվրոպական վերահսկողության հետ, որն ընդգրկում է դա կիրառող օրենսդրությունն ու որոշումները: Դատարանի խնդիրն է որոշել, թե արդյոք ազգային մակարդակում ձեռնարկված միջոցներն ընդհանուր առմամբ հիմնավորված եւ համամասնական են, թե՛ ոչ (տե՛ս *Լեյլա Շահինի* գործը՝ վերելում հիշատակված, § 110): Ավելին, որքանով Դատարանը հնարավորություն է ունեցել ուսումնասիրելու այս հարցը, հստակեցրել է, որ պետությունը, որն անհատի գիտակցության եւ զինվորական պարտականությունների միջեւ ի հայտ եկած հնարավոր հակասությունները վերացնելու նպատակով չի ներդրել զինվորական ծառայության այլընտրանքային

տարբերակներ, ունի հայեցողական լիազորությունների միայն սահմանափակ շրջանակ եւ պետք է ներկայացնի համոզիչ ու ծանրակշիռ պատճառներ՝ որեւէ միջամտություն հիմնավորելու համար: Մասնավորապես, այն պետք է ցույց տա, որ միջամտությունը համապատասխանում է «ծայրահեղ սոցիալական անհրաժեշտությանը» (տե՛ս *Բայաթյանի* գործը՝ վերելում հիշատակված, § 123):

66. Դատարանը նաեւ որոշել է, որ պարտադիր զինվորական ծառայության ցանկացած համակարգ ծանր բեռ է քաղաքացիների համար: Այն ընդունելի կլինի այն դեպքում, երբ այն բաշխվի հավասար հիմունքներով, եւ այս պարտականությունից ազատումը հիմնված լինի լուրջ եւ համոզիչ հիմնավորումների վրա: Այնուամենայնիվ, համակարգը, որով քաղաքացիների վրա դրվում է այնպիսի պարտականություն, որը պոտենցիալ լուրջ հետեւանքներ է առաջ բերում համոզմունքի հիմնավորմամբ զինվորական ծառայությունից հրաժարվող անձանց համար, ինչպես օրինակ՝ բանակում ծառայելու պարտականությունը՝ հաշվի չառնելով անձի խղճի եւ համոզմունքների պահանջները, չի կարող արդարացի հավասարակշռություն սահմանել ընդհանուր առմամբ հասարակության եւ անհատների շահերի միջեւ (նույն տեղում, §§ 124 եւ 125):

բ) Վերոնշյալ սկզբունքների կիրառումը սույն գործի նկատմամբ

67. Դատարանը նշում է, որ ի տարբերություն վերելում հիշատակված *Բայաթյանի* գործի, սույն գործով դիմումատուները, ինչպես վերելում արդեն նշվել է, հնարավորություն են ունեցել տվյալ ժամանակահատվածում խղճի նկատառումներով հրաժարվելու պարտադիր զինվորական ծառայությունից եւ փոխարենը անցնելու «այլընտրանքային աշխատանքային ծառայություն»՝ «Այլընտրանքային ծառայության մասին» օրենքի 2-րդ եւ 3-րդ հոդվածների համաձայն, քանի որ այս ծառայությունը Հայաստանում ներդրվել էր 2004 թվականից եւ իրականացվում էր Հայաստանի Հանրապետության զինված ուժերից դուրս (տե՛ս վերելում՝ 28-րդ պարբերությունը): Այնուամենայնիվ, Դատարանն այն կարծիքին է, որ միայն այդ փաստը բավարար չէ եզրակացնելու

համար, որ իշխանությունները կատարել են Կոնվենցիայի 9-րդ հոդվածով սահմանված իրենց պարտավորությունները: Դատարանը պետք է նաեւ ստուգի այն փաստը, որ տրամադրված ամսական բավարարումը համապատասխանում է անձի խղճի եւ համոզմունքների պահանջներին: Այս առումով, ընդունելով, որ Կոնվենցիայի կողմ հանդիսացող պետություններն ունեն իրենց այլընտրանքային ծառայության համակարգի կազմակերպման եւ իրականացման հայեցողական լիազորությունների որոշակի շրջանակ, Դատարանը համարում է, որ Կոնվենցիայի 9-րդ հոդվածով երաշխավորված՝ համոզմունքի հիմնավորմամբ զինվորական ծառայությունից հրաժարվելու իրավունքը երեւակայական բնույթ կկրեր, եթե պետությանը հնարավորություն տրվեր այլընտրանքային ծառայության իր համակարգը կազմակերպելու եւ իրականացնելու այնպիսի եղանակով, որով օրենքով կամ գործնականում չէր առաջարկվի զինվորական ծառայությանն այնպիսի այլընտրանք, որն իրականում կկրեր քաղաքացիական բնույթ եւ չէր ունենա արժանապատվությունը նվաստացնող կամ պատժիչ բնույթ: Հետեւաբար անհրաժեշտ է որոշել, թե արդյոք տվյալ ժամանակահատվածում դիմումատուներին առաջարկվող այլընտրանքային աշխատանքային ծառայությունը համապատասխանում էր այդ պահանջներին, թե՛ ոչ:

68. Դատարանը նշում է, որ կողմերի միջեւ առկա չէ վեճ այն հարցի վերաբերյալ, թե այլընտրանքային աշխատանքային ծառայողի կողմից կատարված աշխատանքը քաղաքացիական բնույթ ունի, թե՛ ոչ: Այդ ծառայողները կցված են եղել տարբեր քաղաքացիական հիմնարկների, ինչպիսիք են որբանոցները, ծերանոցները, հոգեբուժական հաստատությունները, հաշմանդամություն ունեցող անձանց համար հաստատություններն ու հիվանդանոցները, ու կատարել են սանիտարին հատուկ գործառույթներ (տե՛ս վերելում՝ 33-րդ պարբերությունը): Այնուամենայնիվ, Դատարանն այն կարծիքին է, որ կատարված աշխատանքի բնույթը գործոններից միայն մեկն է, որը պետք է հաշվի առնել այն հարցը որոշելիս, թե արդյոք այլընտրանքային ծառայությունն իրականում կրում է քաղաքացիական բնույթ, թե՛ ոչ:

Այնպիսի գործոնները, ինչպիսիք են իրավասու մարմինը, հսկողությունը, կիրառելի կանոնները, ինչպես նաև արտաքին տեսքը, նույնպես կարող են կարելու լինել այդ հարցը որոշելիս:

69. Դատարանը նախեսառաջ նշում է, որ չնայած այն հանգամանքին, որ այլընտրանքային աշխատանքային ծառայողներն ուղղակիորեն հաշվետու եւ ենթակա էին այն քաղաքացիական հիմնարկների ղեկավարներին, որտեղ անցնում էր ծառայությունը, այնուամենայնիվ, զինվորական մարմիններն ակտիվորեն ներգրավված էին այդ ծառայությունը վերահսկելուն: Մասնավորապես, նրանք Հայաստանի Հանրապետության զինված ուժերի գլխավոր շտաբի պետի հրամանով պարբերաբար ստուգայցեր են կատարել համապատասխան քաղաքացիական հիմնարկներ՝ «այլընտրանքային աշխատանքային ծառայողների աշխատանքային կարգապահությունը վերահսկելու նպատակով»: Այլընտրանքային աշխատանքային ծառայողի չթույլատրված բացակայության դեպքում նրանցից պահանջվում էր ծառայողին գտնելու համար ձեռնարկել միջոցառումներ (տե՛ս վերելում՝ 37-րդ պարբերությունը): Երկրորդ, զինվորական մարմիններն իրավունք ունեին ներգործելու այլընտրանքային աշխատանքային ծառայողի ծառայության վրա՝ կարգադրելով նրանց փոխադրումը մեկ այլ կազմակերպություն կամ ծառայության վայր (տե՛ս վերելում՝ 28-րդ պարբերության մեջ նշված «Այլընտրանքային ծառայության մասին» օրենքի 17-րդ հոդվածի 3-րդ մասը): Երրորդ, այլընտրանքային աշխատանքային ծառայության որոշակի մասեր կազմակերպվում էին «Զինված ուժերի ներքին ծառայության կանոնագիրքը հաստատելու մասին» օրենքին համապատասխան (տե՛ս վերելում՝ 28-րդ պարբերության մեջ նշված Օրենքի 18-րդ հոդվածի 2-րդ մասը): Դատարանը նաև հղում է կատարել Ռասիզմի եւ անհանդուրժողականության դեմ եվրոպական հանձնաժողովի կողմից արված եզրահանգումներին, որոնք Կառավարությունն առանձնապես չի վիճարկել. դրանց համաձայն՝ այն քաղաքացիական հիմնարկների ղեկավարները, որտեղ անցնում է այլընտրանքային

աշխատանքային ծառայությունը, զինվորականներից ստացել են ցուցումներ ծառայության պայմանների եւ իրականացման ձեւի առնչությամբ, իսկ համոզմունքի հիմնավորմամբ զինվորական ծառայությունից հրաժարված անձինք բժշկական օգնություն ստանալու նպատակով ուղարկվել են զինվորական հոսպիտալներ եւ զինվորականներից ստացել են զինվորականների կողմից հաստատված կարգացուցակներ եւ դրանց փոփոխությունները (տե՛ս վերելում՝ 47 պարբերությունը): Հետեւաբար Դատարանը համարում է, որ այլընտրանքային աշխատանքային ծառայությունը տվյալ ժամանակահատվածում աստիճանակարգության եւ ինստիտուցիոնալ առումով բավականաչափ առանձնացված չի եղել զինվորական համակարգից: Ավելին, ինչ վերաբերում է արտաքին տեսքին, Դատարանը նշում է, որ այլընտրանքային քաղաքացիական ծառայողներից պահանջվել է կրել համազգեստ եւ մնալ իրենց ծառայության վայրում: Ինչպես նաեւ այլընտրանքային աշխատանքային ծառայողների գրքույկի կազմի վրա գրված է եղել «Հայաստանի Հանրապետության զինված ուժեր»: Այսպիսով, հաշվի առնելով վերոնշյալ բոլոր գործոնները՝ Դատարանը համարում է, որ տվյալ ժամանակահատվածում դիմումատուներին հասանելի այլընտրանքային աշխատանքային ծառայությունը լիովին քաղաքացիական բնույթ չի կրել:

70. Դատարանն անդրադառնում է այն հարցին, թե արդյոք այլընտրանքային աշխատանքային ծառայությունը կարող է ընկալվել որպես արժանապատվությունը նվաստացնող կամ պատժիչ բնույթ ունեցող ծառայություն: Այն համարում է, որ այս հարցը որոշելիս ծառայության տեսողությունը, ի թիվս այլնի, կարող է լինել դիտարկման համար վերաբերելի գործոն: Այս առնչությամբ Դատարանը հղում է կատարում Սոցիալական իրավունքների եվրոպական կոմիտեի կողմից արված եզրահանգումներին, որոնց մասին նշել է նաեւ Եվրոպայի խորհրդի մարդու իրավունքների հանձնակատարը 2011 թվականի հունվարին Հայաստան կատարած իր այցից հետո ներկայացրած զեկույցում. դրանց համաձայն՝ այլընտրանքային ծառայության տեսողությունը չի

կարող գերազանցել զինված զինվորական ծառայության տեւողությունն ավելի, քան մեկուկես անգամ (տե՛ս վերելում՝ 46-րդ եւ 48-րդ պարբերությունները): Հայաստանի պարագայում, որտեղ զինված զինվորական ծառայության տեւողությունը համեմատաբար երկար է՝ քսանչորս ամիս (տես վերելում՝ 31-րդ պարբերությունը), այլընտրանքային աշխատանքային ծառայության տեւողությունն էականորեն ավելի երկար է, քան այդ ժամկետից մեկուկես անգամ ավելի երկար ժամկետը՝ տվյալ ժամանակահատվածում տեւելով քառասուներկու ամիս (տե՛ս վերելում՝ 28-րդ պարբերության մեջ նշված «Այլընտրանքային ծառայության մասին» օրենքի 5-րդ հոդվածը): Դատարանն այն կարծիքին է, որ ծառայության տեւողությունների միջեւ այդպիսի էական տարբերությունը պետք է արժանապատվությունը նվաստացնող ազդեցություն ունենար, եւ կարելի է ասել, որ դրանում առկա է պատժիչ տարր:

71. Դատարանը նաեւ նշում է, որ Կառավարությունն ընդունել է, որ «Այլընտրանքային ծառայության մասին» օրենքով նախատեսված այլընտրանքային աշխատանքային ծառայության համակարգում առկա են թերություններ: Հայաստանի Հանրապետության խորհրդարանը նույնիսկ էլ ավելի բացահայտորեն է քննադատել այլընտրանքային աշխատանքային ծառայությունը՝ որպես դրա երկու հիմնական թերություն նշելով զինվորականների կողմից վերահսկողությունը եւ դրա տեւողությունը (տե՛ս վերելում՝ 29-րդ պարբերությունը): Ի վերջո, 2013 թվականին թերությունները վերացնելու նպատակով «Այլընտրանքային ծառայության մասին» օրենքում կատարվել են փոփոխություններ, որի արդյունքում Կառավարության մի շարք համապատասխան որոշումներ նույնպես փոփոխվել են կամ ճանաչվել են ուժը կորցրած (տե՛ս վերելում՝ 30-րդ, 34-րդ եւ 36-րդ պարբերությունները): Վերջապես, Դատարանը նշում է, որ այլընտրանքային աշխատանքային ծառայության թերությունները նաեւ ընդգծվել են մի շարք միջազգային եւ ազգային զեկույցներում (տե՛ս վերելում՝ 39-րդ եւ 44-47-րդ պարբերությունները):

72. Հաշվի առնելով վերոնշյալը՝ Դատարանը եզրակացնում է, որ իշխանությունները տվյալ ժամանակահատվածում պատշաճ ուշադրություն չեն դարձրել դիմումատուների խղճի ու համոզմունքների պահանջներին եւ չեն երաշխավորել այլընտրանքային ծառայության այնպիսի համակարգ, որով արդարացի հավասարակշռություն է հաստատվում ընդհանուր առմամբ հասարակության եւ դիմումատուների շահերի միջեւ, ինչպես սահմանված է Կոնվենցիայի 9-րդ հոդվածով: Վերոնշյալից հետեւում է, որ դիմումատուների նկատմամբ մեղադրական դատավճիռների կայացմամբ տեղի է ունեցել միջամտություն, ինչը սույն դրույթի իմաստով անհրաժեշտ չի եղել ժողովրդավարական հասարակությունում:

73. Հանգելով այս եզրակացությանը՝ Դատարանն անհրաժեշտ է համարում անդրադառնալ իրավական պաշտպանության ներպետական միջոցները չսպառելու վերաբերյալ Կառավարության առարկությանը: Դատարանը նշում է, որ 2013 թվականի հունիսի 8-ին իշխանությունները ներկայացրել են օրենսդրական փոփոխություններ, որոնցով հնարավորություն է ընձեռվել դիմումատուներին իրենց վերջնական մեղադրական դատավճիռները ներկայացնելու վերանայման եւ ազատ արձակվելու քրեակատարողական հիմնարկից՝ պայմանով, որ դիմումները ներկայացվեն մինչեւ 2013 թվականի օգոստոսի 1-ը, եթե դիմում են ներկայացնում այլընտրանքային ծառայություն անցնելու խնդրանքով, եւ համապատասխան մարմինը բավարարում է այդ դիմումները (տե՛ս վերելում՝ 32-րդ պարբերությունը): Մինչ այդ, դիմումատուներն արդեն գրեթե երկու տարի կրել էին իրենց պատիժը: Ավելին, այդ միջոցը ներկայացվել է այն բանից հետո, երբ դիմումատուներն արդեն իսկ Դատարան էին ներկայացրել իրենց գանգատները: Դատարանը նշում է, որ չնայած այն հանգամանքին, որ միջոցը տեսականորեն կարող էր հանգեցնել դիմումատուների պատիժների մնացած մասն այլընտրանքային ծառայությամբ փոխարինելուն եւ նրանց վերջնական մեղադրական դատավճիռները *corpus delicti* (հանցակազմի բացակայության հիմքով) բեկանելուն, այնուամենայնիվ,

Վճռաբեկ դատարանի նախադեպային իրավունքից չի բխում, եւ Կառավարությունը նույնպես չի պնդել, որ այն նախատեսված է եղել Կոնվենցիայի 9-րդ հոդվածով երաշխավորված նրանց իրավունքների խախտումն ընդունելու համար կամ այդ իրավունքների ենթադրյալ խախտման հետեւանքով դիմումատուների կրած ցանկացած ոչ նյութական վնաս փոխհատուցելու համար (տե՛ս վերելում՝ 38-րդ պարբերությունը): Ավելին, այդ միջոցի իրականացումը հնարավոր էր միայն այն դեպքում, երբ դիմումատուներն իրենց պատիժների մնացած մասի փոխարեն անցնեին այլընտրանքային ծառայություն, եւ պայմանավորված էր համապատասխան մարմնի կողմից հայեցողական լիազորության շրջանակի հստակ իրականացմամբ: Այսպիսի հանգամանքներում Դատարանը համարում է, որ դիտարկվող միջոցն իրավական պաշտպանության այնպիսի արդյունավետ եւ համարժեք միջոց չի եղել, որով հնարավոր կլիներ դիմումատուների իրավունքների խախտման համար փոխհատուցում տրամադրել: Հետեւաբար այն մերժում է իրավական պաշտպանության ներպետական միջոցները չսպառելու մասին Կառավարության առարկությունը:

74. Հետեւաբար տեղի է ունեցել Կոնվենցիայի 9-րդ հոդվածի խախտում:

II. ԿՈՆՎԵՆՑԻԱՅԻ 5-ՐԴ ՀՈՂՎԱԾԻ ԵՆԹԱԴԻՅԱԼ ԽԱԽՏՈՒՄԸ

75. Առաջին, երրորդ եւ չորրորդ դիմումատուները բողոքել են, որ դատարաններն իրենց կալանավորման մասին որոշումներում չեն ներկայացրել հիմնավոր եւ բավարար պատճառներ: Նրանք հիմնվել են Կոնվենցիայի 5-րդ հոդվածի 1-ին կետի վրա:

76. Կառավարությունը վիճարկել է այս պնդումները:

77. Հաշվի առնելով սույն գործի փաստական հանգամանքները, կողմերի փաստարկները եւ Կոնվենցիայի 9-րդ հոդվածի մասով կատարած իր եզրահանգումները՝ Դատարանը համարում է, որ այն քննել է սույն գանգատում բարձրացված հիմնական իրավական հարցը, եւ չկա սույն բողոքի վերաբերյալ

առանձին որոշում կայացնելու անհրաժեշտություն (տե՛ս, *mutatis mutandis*, *Կամիլ Ուզունն ընդդեմ Թուրքիայի* [*Kamil Uzun v. Turkey*], թիվ 37410/97, § 64, 2007 թվականի մայիսի 10, եւ *Իրավական ռեսուրսների կենտրոնը՝ ի դեմս Վալենտին Կամպեանուի, ընդդեմ Ռումինիայի* [ՄՊ] [*Centre for Legal Resources on behalf of Valentin Câmpeanu v. Romania* [GC]], թիվ 47848/08, § 156, ՄԻԵԴ 2014):

III. ԿՈՆՎԵՆՑԻԱՅԻ 41-ՐԴ ՀՈԴՎԱԾԻ ԿԻՐԱՌՈՒՄԸ

78. Կոնվենցիայի 41-րդ հոդվածի համաձայն՝

«Եթե Դատարանը գտնում է, որ տեղի է ունեցել Կոնվենցիայի կամ դրան կից Արձանագրությունների խախտում, իսկ համապատասխան Բարձր պայմանավորվող կողմի ներպետական իրավունքն ընձեռում է միայն մասնակի հատուցման հնարավորություն, ապա Դատարանը որոշում է, անհրաժեշտության դեպքում, տուժած կողմին արդարացի փոխհատուցում տրամադրել:»:

Ա. Վնասը

79. Դիմումատուներից յուրաքանչյուրը պահանջել է 32 400 եվրո՝ որպես ոչ նյութական վնասի հատուցում:

80. Կառավարությունը վիճարկել է այդ պահանջները եւ պնդել, որ պահանջվող գումարները չափազանցված են:

81. Դատարանը համարում է, որ նրանց նկատմամբ կայացված մեղադրական դատավճիռների եւ ազատազրկման հետեւանքով դիմումատուները, անկասկած, կրել են ոչ նյութական վնաս: Այն դիմումատուներից յուրաքանչյուրին շնորհում է 12 000 եվրո՝ որպես այդ վնասի հատուցում:

Բ. Ծախսերը եւ ծախքերը

82. Դիմումատուները նաեւ պահանջել են ընդհանուր առմամբ 11 900 եվրո՝ ներպետական դատարաններում իրենց ներկայացրած երկու փաստաբանների համար կատարված ծախսերի համար, եւ 9 000 եվրո՝ Դատարանում իրենց ներկայացրած երկու փաստաբանների համար կատարված ծախսերի համար: Ի հաստատումն իրենց պահանջների՝ դիմումատուները ներկայացրել են փաստաբանների կողմից իրենց հասցեագրված գրությունները, որոնցով պահանջում էին կատարված աշխատանքի տարբեր մասերի համար վճարել միանվագ գումար:

83. Կառավարությունը նշել է, որ պահանջվող գումարները չափազանցված են եւ ոչ պատշաճ հիմնավորված: Նախեստառաջ, դիմումատուները գործին ներգրավել են չափազանց մեծ թվով փաստաբաններ: Երկրորդ, պահանջված ժամավճարի դրույքաչափը (200-ից 300 եվրո) Հայաստանում անիրական է: Երրորդ, չի կարելի ասել, որ նշված գումարներն իրականում ծախսվել են, քանի որ դիմումատուների կողմից ներկայացված գրությունները կողմերի միջեւ փաստացի կնքված պայմանագրի կամ հաշիվ-ապրանքագրի բացակայության պայմաններում չեն կարող համարվել վճարման կամ հետագայում վճարելու պարտավորության ապացույց: Չորրորդ, դիմումատուները չեն տրամադրել մանրամասն տեղեկատվություն՝ կատարված աշխատանքի ժամաքանակի վերաբերյալ:

84. Դատարանի նախադեպային իրավունքի համաձայն՝ դիմումատուն ունի ծախսերի ու ծախքերի հատուցման իրավունք այնքանով, որքանով ապացուցվել է, որ դրանք իրականում կատարվել են, անհրաժեշտ են եղել, եւ որ դրանց չափը եղել է ողջամիտ: Սույն գործով դիմումատուները չեն ներկայացրել որեւէ իրավական փաստաթուղթ, ինչպես օրինակ՝ իրենց ներկայացուցիչների հետ կնքված պայմանագիր կամ նրանց կողմից տրված հաշիվ-ապրանքագրեր՝ ի հաստատումն իրենց այն պնդման, որ նրանք պարտավոր են վճարել նշված

գումարները: Դիմումատուների կողմից ներկայացված գրությունները չեն կարող ապացույց համարվել: Այս հանգամանքներում Դատարանը մերժում է դիմումատուների՝ դատական ծախսերի մասով պահանջը:

Գ. Չկատարման դեպքում հաշվարկվող տոկոսադրույքը

85. Դատարանը գտնում է, որ չկատարման դեպքում հաշվարկվող տոկոսադրույքը պետք է հիմնված լինի Եվրոպական կենտրոնական բանկի սահմանած՝ լոմբարդային ռեպոյի տոկոսադրույքի վրա, որին պետք է գումարվի երեք տոկոսային կետ:

ԱՅՍ ՀԻՄՆԱՎՈՐՄԱՄԲ ԴԱՏԱՐԱՆԸ ՄԻԱՁԱՅՆ՝

1. Որոշում է Կառավարության՝ իրավական պաշտպանության ներպետական միջոցները չսպառելու մասին առարկությունը միացնել գործի ըստ էության քննությանը եւ մերժում է այն.
2. Հայտարարում է դիմումատուների՝ մտքի, խղճի եւ կրոնի ազատության իրավունքի ենթադրյալ խախտման ու դատարանների կողմից առաջին, երրորդ եւ չորրորդ դիմումատուների կալանավորման համար հիմնավոր ու բավարար պատճառներ չներկայացնելու վերաբերյալ բողոքներն ընդունելի.
3. Վճռում է, որ տեղի է ունեցել Կոնվենցիայի 9-րդ հոդվածի խախտում.
4. Վճռում է, որ չկա Կոնվենցիայի 5-րդ հոդվածով փոխկապակցված՝ առաջին, երրորդ եւ չորրորդ դիմումատուների բողոքների վերաբերյալ առանձին-առանձին որոշում կայացնելու անհրաժեշտություն.

5. *Վճռում է, որ՝*

ա) պատասխանող պետությունը, Կոնվենցիայի 44-րդ հոդվածի 2-րդ կետին համապատասխան վճիռը վերջնական դառնալու օրվանից՝ երեք ամսվա ընթացքում ոչ նյութական վնասի դիմաց պետք է դիմումատուներին վճարի 12 000 եվրո (տասներկու հազար եվրո)՝ գումարած գանձման ենթակա ցանկացած հարկ, որոնք պետք է փոխարկվեն Հայաստանի Հանրապետության դրամով՝ վճարման օրվա դրությամբ գործող փոխարժեքով.

բ) վերը նշված եռամսյա ժամկետի ավարտից հետո՝ մինչև վճարման օրը, պետք է հաշվարկվի վերոնշյալ գումարների նկատմամբ պարզ տոկոսադրույք՝ չկատարման ժամանակահատվածում Եվրոպական կենտրոնական բանկի սահմանած՝ լոմբարդային ռեպոյի տոկոսադրույքի չափով՝ գումարած երեք տոկոսային կետ.

6. *Մերժում է* դիմումատուների՝ արդարացի փոխհատուցման պահանջի մնացած մասը:

Կատարված է անգլերենով եւ գրավոր ծանուցվել է 2017 թվականի հոկտեմբերի 12-ին՝ համաձայն Դատարանի կանոնակարգի 77-րդ կանոնի 2-րդ եւ 3-րդ կետերի:

Աբել Կամպոս

Քարտուղար

Լինուս-Ալեքսանդր Սիցիլիանոս

Նախագահ